

聽  
雨  
樓  
隨  
筆

聽雨樓隨筆卷七

滇南昆明錢履和舉人大挑知縣

用知縣俱分發來川履和字勘生補安岳忻和號香士補  
郫縣嘗以其先人南村先生澧墨迹屬爲作跋按先生乾  
隆辛卯進士通政司副使視學湖南操守嚴厲待諸生如  
子弟書學顏米得其手迹如獲拱璧工詩七律似空同滄  
溟和人荊州詩云夔門東下接荊州不盡濤聲日夜流野  
次天分鶻尾闊門高山礫虎牙秋雄都峙楚規南幸重鎖  
窺吳號上游請向昇平論形勝江花睡穩一沙鷗送輔臣

宗兄赴平魯兼寄望峰馬鳴夜火戒征車北出居庸百里  
餘雲勢九邊臨塞慘雪痕三月冒沙虛民耕斷磧時登粟  
官坐空衙或藝蔬隔面十年家萬里莫驚相視鬢斑如

劉乙乙樂昌人生五歲其父徙家西蜀因貧不能兼活棄  
置道旁後稍長呼天刺血書籍貫榜於背走數千里尋親  
識其母於酉陽知父已下世五年矣遺二妹奉以歸行至  
唐崖得寒疾迫於凍餒逆旅人不肯留棲息古廟其母因  
遠近無業醫者詣萬鍾傑求方劑憫乙乙至性肫懇行篋  
得京都奧繫機七寶丹註治疾甚夥效亦甚奇授一丸服  
之汗出如潑水病愈詣鍾傑謝鍾傑贈以歸資更爲詩示

之爾生何足多。蜉蝣與螳螂。爾生殊可惜。魂魄化鬼蜮。試  
說爾死日。沈動迫中腸。爾身委溝壑。爾母哭路旁。爾妹啼  
且飢。日暮愁虎狼。年年杜鵑血。不得歸故鄉。愴然愛莫助。  
相視終傍徨。倒我千里篋。起爾七尺強。青囊貽妙藥。勝飲  
金薤霜。至性衆所憫。青青者上蒼。慈烏集深樹。返哺噪夕  
陽。提攜捧負去。膝下歲月長。登堂向我拜。我愈慙不遑。原  
有活人心。不繫肘後方。鍾傑雲南昆明人乾隆拔貢生  
官福建按察號荔村偶儻工詩  
自宋玉高唐賦而巫山神女盛著於世。唐人云。蘇州刺史  
今才子行到巫山。必有詩。謂白居易也。而樂天不肯留題。  
古人不苟落筆。如此後人。乃多詠之。滇南萬荔村鍾傑詩。

云高辛季女騎蒼龍助禹治水多神功八年底績上帝喜  
玉書金檢膺元封三十天不肯住飛來迴立巴江東霞  
帔曉披赤城縣雲輶晚過蓬萊宮鞭鸞笞鳳敞虛閣珠娘  
龍女齊匆匆玉顏長在閱今古花冠低簪垂碧空遂令千  
載好事者時說環珮吹天風尋常靈氣護奇秀明滅春光  
青濛濛今日一帆好風色蛾眉十二來飛蓬含情凝睇軒  
軒起綽約紅蕖出淥水人心隨物有深意疑到閬風九萬  
里上擁翠翹金丁當下綴明珠錦旂旒或如危坐青雲端  
或如試粧寶鏡底或窺半面擎玉簫或現全身卻簪珥或  
迎朝日色乍飛或畏芳寒睡正美或揚彩袖驚鴻前或門

腰肢回雪裏須臾變化盡殊相縹緲超忽無定止盈盈隔  
水不得語春到洞庭波闌紫多才宋玉賦高唐暮暮朝朝  
夢楚王仙緣不斷塵根蒂爲兩爲雲空斷腸三峽流泉淼  
淼去渚宮碧草萋萋長我來三過黃牛峽白蘋紅蓼滿樓  
牒輕烟迷離遮寶裝淡月朦朧隱花顏此行分明江上逢  
欲陳悃素託靈笈旌旗搖曳隨空蒼芝蓋悠揚去颯還薄  
暮滿耳猿狖聲霜打寒林落黃葉惟有祠前翠竹條年年  
枝上宿秋蝶

國初時廣安歐陽淇竹名濬年後改名直好讀書美姿容  
陷賊營歷受鞭笞炮烙之刑自分必死賊婦趙氏爲之求

免解僞鎮西王營王拔劍欲刃之有婦跪而哀祈遽斂劍  
既出有使來言奉女孥家命召至閣中卽前爲乞命者王  
之寵夫人向氏也相見泣下屏人語僞言與直係姑表故  
得釋教以家世備問答賊厚視之妻以二美婦後逃歸有  
撫軍馬公乾者牧廣安時拔直童子第一者也言於曾英  
題授安居令大清兵來馬公殉節俘送王公遵坦繼而隨  
李公國英展轉兵戈間又從楊展吳三桂武大定孫可望  
李定國多爲記室嘗臥草間兩虎過不之見飢民以人爲  
糧同行三人兩被獲直獨跳免七日無食不死屢爲賊掠  
不死凡七易妻初婚劉氏繼張氏善琵琶工琴奕元配劉

氏姿麗性敏出詞有章手不釋卷若經生嘗割股救母工  
詩年二十二卒思母云夢到家鄉覺又非思親不見淚沾  
衣巴山雨雪萱花老篆水風煙雁羽違目斷白雲空有憾  
哺還烏鳥竟難歸何如化作梁間燕歲歲差池傍母飛江  
村云亂離空翠斂晴霞江上孤貧三兩家對對鳴鳩愁宿  
雨牢牢龐犬臥殘花暮雲荒徑隨風掃古木頽垣帶月斜  
滿地榆錢人未拾羣飛白鷺下平沙避亂渠江云片帆破  
霧過晴沙旅况霜摧兩鬢華蹈海何人能避世思鄉有我  
未還家十年塵夢隨流水一曲漁歌弔晚霞烽火未消書  
不至怕看歸雁入蘆花有女同江避難增感鄰舟少婦坐



江花翠斂雙蛾怨日斜爲問孤踪何處侶自言數載已無  
家髣鴉欲櫛憑風雨涕淚空零逐浪沙司馬青衫今更溼  
那堪重聽訴琵琶

向畜海廷賡字修野康熙丙子舉人博極羣書舉博學鴻  
詞不就爲廣文三十餘年淡泊自守如枯僧年七十餘作  
生壙並爲文以誌彭端淑云吾鄉前輩向廷賡修野詩多  
爲人傳誦春興云蜂王衆建開新國燕子多情入舊家又  
有句云帶月斫柴攜稚子揮毫持柬問先生皆可誦  
成都知縣尤琛湖南長沙人發奸摘伏有神明之稱少時  
過湘溪野廟塑紫姑神甚美愛之手摩其面題詩於壁云

藐姑仙子落烟沙玉作闌干冰作車若畏夜深風露冷  
權籬茅舍是郎家至夜有美女相就自云上清仙女偶謫人間  
司雲雨之事感郎意故來遂如伉儷以紫絲囊相贈言  
織女所賜佩之助人文思及成進士女佐其爲政一日置  
酒爲別云謫限已滿辭去查四川通志成都知縣無尤名  
其事頗韻付諸傳疑可耳

成都馬良柱由行伍官建昌總鎮貌奇偉虬髯繞輔頰聲  
如洪鐘目閃爍不可逼視討瞻對攻金川効力西陲大小  
數百戰賊望旗幟先遁待士卒嚴而有恩屢立奇功多膺  
力驍果善戰臨陳馬上舞鐵鞭迴旋如風召見乾清宮左

右以鞭進使舞 上親臨觀因冠不正問之免冠謝則硯  
礪崢嶸突起頂上 上笑曰獅子頭也由是名播中外人  
以此尉遲敬德乾隆二十七年壽八十一卒生平奮勇直  
前體受刀箭瘢刻畫如虎紋所歷蠻烟瘴雨盛夏雪積山  
精畫嘯毒虺夜蟠出入萬死之地以老壽終二子一應詔  
官副將亦善鐵鞭 上命之舞如其父一名瑜征川楚教  
匪身經百戰不避艱險勇冠三軍官至湖北提督加銳勇  
巴圖魯

浙江鄞縣黃玉符名霖遊蜀愛浣花之勝遂卜居焉善畫  
菊自號菊花老人歸農詩云我愛騎驢婦坐車兒肩書籍

僕擔花出城未到青羊市先問橋頭賣酒家絕妙雅人移  
家圖

建昌某妻段氏氏父名功雲南人元末爲梁王所殺氏將  
嫁以旗與弟曰此仇必報我將建昌兵以助作七律二首  
甚悲慘是時年方十五耳會明師入滇梁王死乃止國朝  
張月槎名漢者奇其事作詩美之此生恨不生爲奇男子  
父仇手刃不忘死展旗語弟憤難消恨積點蒼凝雪涕鞭  
尸未如伍子胥女俠心同聶政姊西歸不盡淚淋淋逝比  
蜀川千尺水復仇志不成此事長已矣天道固好還興廢  
轉環耳君不見黑灰一度昆明劫梁王自刎涔涔血燕入

尋常百姓家不認梁王舊宮闕何如之子復仇一寸心千  
古昆池照明月

月槎石屏人

郭蘭石先生視學四川歲試鄰水某童詩文並佳題前書  
二十四字云富貴福澤心田普照若取斯人冥無顯報用  
警世人改惡向道詩後又書云人在號邊神在號前叫我  
先寫陰隲與心田後寫文字與詩篇若不信他言恐負神  
人勸若要信他言恐誤我黃卷霎時間昏迷不醒叫我一  
時難分辨悲蒼天悲蒼天前若有緣後若無緣我只得實  
情對青天查卷出批云是必有陰奪其魄者詞雖俚足見  
在在有鬼神也

阮亭先生好采人詩句流傳錄安岳馮山允南五言云春

蟬繞屋晴意鳥臨窗曉日雲輕放林花水倒沈七言云

抹綠

原

逢雨後殘粧桃李過春深亭榭寂爲閒處所溪山

清帶古風流援琴故故彈流水隱几蕭蕭聽竹音瞿塘峽

二十四韻寫夔州山川字字逼肖不身歷其境者不知也

起云絕勝瞿塘峽西陵古地形巴江深洞穴蜀主舊門庭

王氣吞三峽神功出五丁繼云衆流趨灩澦遠意會滄溟

顧盼疑無地幽陰似有靈白鹽懸日月黑石鼓雷霆鑿鑿

餘痕在高深巨勢停魚龍憑險怪烟霧鎖沈冥念昔勤探

索嘗言駭觀聽波濤眞激箭舟楫劇奔星殆欲頡頏老杜

按灘瀕堆積石磊落怒流噴激有人乘舟垂繩墜石水深  
八十四丈夏中水漲石上水猶三十餘丈瞿塘兩崖對峙  
峽口石盤上樹鐵柱二根山畔崖穴中有鐵鎖七條柱高  
六尺四寸索長二百七十七丈五尺昔人置以截江者柱  
於夏秋水泛則汨冬春復見

朱子穎轉運重慶身非瑰偉鬚亦不多獨脣上二莖飄飄  
長尺餘甚自喜也錢瑾巖青選爲賦龍髯歌云腹寬不嫌  
軀幹小貌奇尤咤髭髯絕不作獅兒蝟刺張復非仲堅虬  
色赤口上兩行長尺餘人謂龍形異凡格又云西風落木  
海水深靜夜開筵月影窄與君縱談當世事口髭怒張聲

嘯咭飛騰萬態天地愁恍惚靈雲滿前席酒闌燈灺漏沈

沈卓絕眉峰相映碧形容鬚眉欲動

青選陽湖人

吾東平原董樸園先生淳官四川布政由縣令起家多善  
政教匪之亂盡力防堵作雪夜防漢圖張白華題之云雪  
花爭舞謝莊衣鱗甲漫空亂鼓聲銀海光生搖劍戟潢池  
波斷戮鯨鯢賦才早已游梁擅鏡曲應從破蔡題令我披  
圖難和郢楚天雲樹望中迷公與張爲同年任岳池署合  
州屢相唱酬旋任後和張寄懷詩云宅傍三江曲水環半  
居城市半林間經通爾雅知鼯鼠言寓蝸牛陋觸蠻東國  
西川聯譜末舊歡新聚恨緣慳代庖一載慚非分敢望珠



仍合蒲還誦罷吟箋興倍酣靜觀身世已心諸書香但望  
能繩祖豚大安誇克肖男聚處酒詩曾我共別來風月竟  
誰談衙齋自可容懸榻何日高軒駕兩驂

夏紹新字樂村官四川瀘州在蜀幾三十年多誦其德歸  
林下十餘年與二三老友詩酒盤桓月泊具邀里人與諸  
子會文生平敦孝友接物謙和建南口占遊宦十六載遍  
歷蠶叢路棧道雖崎嶇猶未盡窘步今茲來建南遂險乃  
畢露雅河泛洪波孤舟入陰霧星馳風木了驂停觀音舖  
飛龍越斜麻榮經又暫駐朝行磨刀溪夕向關山禹象嶺  
千丈矗雨雪長年注上聞亂松吼下聞巨濤怒行盡廿四

盤憩息椒花樹瘴癘瀟瀟水鬼憐慘大渡八里煎茶坪峻  
嶒劍戟布絕壁繞羊腸驚悸敢叱馭沈黎與越巂南北遙  
相屬竇羌環山居男婦嫠如瓠族類一何殊山川已異趣  
虎豹時攫人白晝誰敢捕况有伏莽徒文檄難告諭迢迢  
建昌鎮雄踞西塞戍原野日蕭條悲風來薄暮顧我守一  
官寧謂遠遊誤振頓登前途壘山更無數信宿幾多時一  
朝忽抵署此州名會理民窮少財賦政簡刑自清與民安  
僕素文翁不可作乖崖冀再遇長此事耕鑿或者臻富庶  
回首邛徕關夢寐猶恐怖差喜近鄉邦音書可常附岵岵  
陟無已嗟我增孺慕

樂村雲南姚州人

奢酋之亂重慶失陷全川震動胡輔之以忠州州判改石  
柱向秦良玉乞師救援兵未發號泣五口水漿不入口良  
玉感動乃興師以往卒復重慶誠古今奇男子後官貴州  
布政以不謹罷知明政之不綱也萬友正乾隆壬申舉人  
過其故里弔之云弱臂曾彎兩石弓二郎關續鄧川東乞  
師直向秦廷哭安國枉論僕射功抗表有人開廢籍楊嗣昌表  
薦監紀還家無地失英雄至今嗚咽南明水應悔書生早習  
戎按輔之建水人萬厯丙子舉人字曰平表題曰功載全  
川

張象狝字六飛安岳人康熙甲辰進士初宰饒陽請裁驛

站嚴治盜盜風頓息後牧吾東膠州設養生堂建藥室全  
活甚衆著有處和詩集登瓦屋山云帶雨入荒寺松風一  
殿幽枯燈寒古佛殘葉落危樓法界猶灰劫吾生眞浪游  
烟雲能護枕且夢辟支游瓦屋山辟支佛所生地在洪雅  
榮經二縣界高一百四十里絕頂平厰可十餘里有泉眼  
七十二四時清冽常現辟支普賢光明號辟支道場山有  
獸如角端食虎豹不傷人六飛以早失怙恃每忌致奠盡  
哀如初喪宜出山爲循吏而詩亦迥然絕塵

張孝子名曰華洪雅人三歲而孤國初蜀亂年十歲與兄  
日熾在塾爲遊兵略去隸左標章臣營日華思母日夜嘯

不食他人與兄勸之不聽章臣妻董氏聞而慰之曰有爾方見母不食安有爾爾且飲食若知母信吾送爾歸日華喜躍乃食後移營日熾不知所往由此去建昌歷福建廣西貴州雲南私斷酒肉祈早見母至康熙四年駐湖廣十年有自川南回者問知母耗罄囊獻主將歷萬山踵蘭趾裂越兩月抵家母子再聚在外十九年矣在雲南同營有嫠婦屢訂終身日華舉誓生不見母不娶至是始營家計娶妻生子母病劇刲股以進病愈歿後廬墓三年念母當亂離賴蔬以濟遂絕葷終身卒年八十一子春元副貢忠州學博周景璠長夏倦臥夢一偉男子長髯方面明時

衣冠曰我陳瑞也帝命司此土祈於署後榕樹下營一宅  
醒以爲幻夜夢如初翌午又夢其人再三言之乃立祠書  
鄉賢陳公瑞土地神位夜夢來謝陳公明成化戊戌進士  
官給諫有直聲官終光祿寺卿正直爲神信哉景璠乾隆  
年間任  
按察朱荔裳先生琬夢至荒郊見武侯借寓民間次日詢  
老人言武侯祠在府治西南往觀但見瓦礫荆棘酷似夢  
中所見乃捐俸建祠

威遠李信齋名慎彝嘉慶丁卯舉人戊辰進士卽用知縣  
籤掣福建初署晉江繼補臺灣俱有政聲每訪里下老成  
兼有才幹者優禮之藉爲耳目緝兇捕盜所往輒獲咸驚

爲神閩俗多械鬪往往因一命釀至數十命信齋悉心究問案無屈抑械鬪之風漸息晉江施姓封侯名烺裔也驕悍不法鄉曲附之者門掛施家庄牌卽抗不納糧前官墊賠已久公曰彼世受國恩宜踴躍以爲民望我奉命守此土不惟力不能賠亦分不應賠徵收時親往以理論之不聽火焚其宅施聲氣頗廣事聞於朝及上憲傳詢李曰民抗奉法之吏官懲玩法之民苟完糧吾願修還其宅案遂結後之官此土者不墊賠皆曰此李公力也令臺灣時淡水廳有警太守首薦之欲辭不得有應交項二萬餘倉皇無措五日內士民捐金至一萬八千餘及之淡水辦

理得宜賊平後上憲拔補淡水同知勸民修城以資捍衛  
後將進京引見士民送洋銀七千圓不受解纜起程後  
士民使人乘小舟追至日前所送項出於士民至誠敬存  
某字號以待公言訖委券而去歸里後券爲家人竊去鳴  
於官時李懷庭爲令不之信聞於上憲上憲移文至福建  
查問士民稟覆云賴李公全其生故有此舉日望李公再  
來也距今不來知其不復出矣乃賁送其家

丙穴魚其穴向丙故名昔出褒水今漢中不屬蜀而蜀中  
出丙穴魚不但雅州聞彭縣大魚洞小魚洞什方河中俱  
出嘉魚細鱗少刺味極肥美咏之云穴居深處水冥冥忽



見銀鱗躍淺汀向雨還應先去乙好將烹法付庖丁

重九公出旋署後與諸友會龍神祠作展重陽詩許鴻軒  
七律云縱步龍山補快游重陽節後聚名流幾聲疎雨階  
前滴一片寒烟野外浮囊貯朱萸情似昔英舒黃菊景猶  
留先生逸興如彭澤醉後酣歌共倚樓龍祠在城內山上  
許名崇基前任簡州州判名桂號夢鷗孫也父爇遊幕在  
川後任山西安邑巡檢號森菴

明巡按劉之勃爲獻賊所執脅降不屈書歌於案云吾親  
嗟已逝非君安所之遙遙孤臣影化作杜鵑飛飛向北關  
繞帝軒飛向北土繞墓田若是杜鵑會有死死作厲鬼吞

逆羶逆羶應不共戴天葬厥骨兮我之顛大明代巡劉之  
勃書文秀白獻忠縛之勃端禮門外射之之勃罵不絕口  
而死

西昌寧遠府首縣山出銅礦昔官紳士民倚爲金穴今洞  
老山空銅價日昂地近邊塞氣候不齊冷則夏可披綿暖  
則冬可衣絺書綸有詩數首足志風土邛海非江水絕底  
暗通潮天影落虛靜山川隨動搖如何挾夏雨遽乃浸秋  
苗不道長河廣波瀾漸漸消未遂游山興城樓共客臨風  
烟開沓嶂水石澹重林日與西陲遠秋應北望深躊躇懷  
古意縱筆漫長吟石洞留仙蹟雲峯出玉泉仙人騎鶴去

玉體尙冷然我愛升菴筆來尋古洞天題詩人不見流水  
自年年控險資雄鎮連環十二營麾旗夷瘴散試馬野花  
明春暖烏蒙國霜寒孟獲城鄉民傳令節猶爲武侯迎漢  
代征西夔窮荒烏道開至今諸父老猶自待招徠板屋星  
居錯禾田火種纔近來人廣聚夷漢雜巖隈地接滇池近  
天過相嶺低隔山分冷暖流水任東西爐火千僮鑄蟲園  
萬戶齊邊方多樂歲無事餉炊藜繞屋園蔬密隨田堰水  
通塢承仙掌露逕颺稻花風小市新添織荒巷徧訓蒙安  
居同上國何更賦哀鴻椎髻披毡毳榛榛自在游鍋裝連  
袂舞酒債計田酬混沌若無鑿遐荒安有憂忘機對鷗鳥

親近可同舟面面設重關  
邛城逼裸蠻雷喧懷遠水  
雪隱小涼山戍鼓今無警  
荒田半就刪閭閻安作息  
自覺訟庭閒一樹寒梅發  
無人亦自香詠花誰見賞  
携酒客同狂紅杏先爭候  
黃華並耐霜南天風信異  
滿目得春光

余初莅榮縣試取吳邁第一後多閱其文不知其能詩也  
忽以一冊見投七古大霧行絕奇蒼茫塵世一氣裹開戶  
大呼天欲墮隔離但聽鷄犬聲咫尺見人空際坐疑是風  
伯矜神工夜吹家入太虛中又疑天孫織錦餘綺降散作  
人間碧紗帳抑或媧皇鍊石補天傾墜雲下補地不平否  
則十二萬年乾坤毀不浮不凝洞洞爾我且置身鼇峯顛

試看開闢者誰子須與赤輪飛海邊化作紅霞蒸滿天萬  
山如粧加新妍噫吁嘻人生萬事皆塵土大霧一朝似千  
古題楊忠武侯勤勞錄云罄紙難書百戰功血袍汗馬緬  
英風面如壯繆心俱赤膽似順平才更雄蕩寇威加河內  
外安邊績著陝西東勲勞直是楊無敵尤愛封侯壽考終  
題袁簡齋詩集云遭逢卿相都青眼管領湖山到白頭嘲  
禱佛者云黔首甘心祈木偶沙門巧計當錢神寒窗即事  
云把盞月來邀對酌開窗風過替翻書尤工於集古一氣  
旋轉如自已出前人無以過也題爲秋興一年容易又秋  
風落木寒泉聽不窮幾處園林蕭瑟裏數聲鷄犬翠微中

試尋野菜炊香飯却揀蘋汀下釣筒富貴不淫貧賤樂此  
心期與古人同桂花香動萬山秋風物淒淒宿雨收野鶴  
巢邊松最老夕陽城上角偏愁恨無陽子一區宅安得元  
龍百尺樓此外俗塵都不染好山長在水長流遠日非春  
亦自傷碧樓紅樹倚斜陽天空絕塞聞邊鴈水落蕪葭足  
夜霜獻賦十年猶未遇愁來一日即爲長月光常照金樽  
裏且放懽情入醉鄉澹然空水帶斜暉日日江樓坐翠微  
赤葉黃花隨野岸清泉白石鎖烟扉簾前春色應須惜竹  
外秋聲漸作威一種閒愁無著處琴牀茶鼎淡相依適來  
世上豈緣名賈誼何須弔屈平芳草伴人還易老塵心終

日自勞生山從飛鳥行邊出月到中秋分外明亦擬村南  
買烟舍不將蘿薛易簪纓乾坤萬事上眉端擬結茅廬積  
翠間洗藥每臨新瀑水採芝多夢舊遊山樽中美酒常須  
滿世上浮名好是閒爲問秋風舊來鴈如何飛倦始知還  
猶有四首未錄

胡水雲名滢浙江紹興人道光癸未進士善堪輿在京時  
有大臣保舉爲固倫公主擇陰地自請代奏素以筆墨爲  
生不敢仰邀 恩典 上稱爲高雅先選貴州綏陽改授  
四川榮縣水雲藐小丈夫而擅拳勇團練丁壯親與教師  
點撥偶聳身跳跌地傷足由此得疾告歸留別士民七律

四首錄其二云戲場何必認爲真 聖主親呼高雅人幼  
學曾懷鴻鵠志服官已作馬牛身兒孫好向心田問父老  
非從膜外親幾及三年慚撫字聊將淡泊對斯民人生原  
貴葆天直末俗澆風漸染人我欲明倫敦古道羣嫌好直  
剩孤身地隣蠻境防須密民練軍威訓必親竚看風清羣  
樂業優游共作太平民

大足杜雲騶字香國遷成都居寄雲別墅在北門珠市園  
亭有花竹之勝好爲詩註選貳尹不赴家居課子著有琴  
餘草長樂園云因尋勝境訪仙莊曲徑通幽草木香翠竹  
常新朝浥露飛泉不斷晚生涼名花有意留春色好鳥無



心學轉簣美殺此翁真世外閒中妙趣箇中藏題陸橘洲  
少尉蓼園憶舊圖云名園擁翠出雲嵐笑對溪邊小結庵  
遙憶蓼花成故舊一圖烟雨望江南遊春云載酒携琴踏  
翠微呼童早出掩柴扉鶯聲出谷迎人語蝶影穿林繞徑  
飛嫩柳籠煙拂滿袖嬌桃帶雨任沾衣溪南小岸停鞭望  
一路殘紅映夕暉佳句如墻角西風吹蔓草佛頭春雨長  
苔花老樹籠煙迷石洞荒藤帶露掩僧房僧從樹杪穿雲  
出船趁風中破浪來皆可誦

亡友趙竹菴以秋月秋雲等十二首索和未暇作也榮邑  
汪涵有詩十二首選錄其四秋霜云馬蹄踏碎板橋霜水

上薰葭色盡蒼落葉半林殘月影曉星一點曙袍光秋容  
漸染烏頭白天意將收鴨脚黃堪羨故園多晚景傲寒猶  
自吐芬芳秋風云才謝南薰解愠功蕭蕭蘋末忽西風送  
將鷹隼來塵外引得蓴鱸入夢中無恙又增團扇感有聲  
都作大王雄欲知涼意吹何處如水空堦落葉紅秋泛云  
偶向江邊泛小舸白蘋紅蓼映輕橈一蓬夜色黃牛月兩  
岸秋聲赤壁簫瑟瑟荻花商婦拍蕭蕭木葉廣陵潮水晶  
宮闕如天上掛起雲帆近九霄秋聲云蕭條秋氣韻乘金  
天籟刁騷撼不禁擱耳疎鐘梧滿院捲簾清笛月千林寒  
鴉嘔嘓吳娘賦歸雁淒涼楚女砧十萬軍聲潮半夜一齊

收入短長吟七古未盡合格而才氣橫放江上望峩眉歌  
云昔聞元岳之峰三千九百丈連厓直與天孫抗嵩宗之  
峰三十六凌霄玉筍排無數不及峩眉天下奇青空萬古  
無端倪我至嘉州經幾度翠色半空曾寓目西風吹動青  
衣流少皞之司行清秋青紅鬼怪蹲眼底龍吟能咆陰厓  
裡今來拭目當炎天遙看石梯雲棧相勾連疑是共工裂  
破不周柱絕頂天瓢傾山巔帝愁四維弱故遣夸娥負此  
鎮坤乾又疑女媧鍊石補天闕白螭幻出雲疊疊安得長  
房之妙術縮如九華壺中貯念此茫茫望九垓安得左手  
持浮邱右手拍洪厓鵲頭剪斷三秦臂合抱蓮花向天開

我歌歌益放歌罷形神旺但願此身化爲鵬與鵬搏扶搖  
羊角而直上

俗傳火焰山在今寧遠府所屬會理州府南十五里有瀘  
山古瀘州地也山極高下臨邛池俗稱邛海週迴約三百  
里過水登山有古栢千百年物大可數十人合抱自山至  
頂廟宇十三處層疊而上有泉焉通以筧下注足各寺之  
用每歲六月二十四日夜間城市鄉民縛松枝門前然火  
山上望之如繁星萬點楊升菴詩云老夫今夜宿瀘山驚  
破天門夜未闕誰把太空敲粉碎滿天星斗落人間榮縣  
曾唯堂習傳爲寧遠教授題詩云青青簇擁幾多峰一抹

烟痕潑翠濃今夜幸當城不夜萬家燈火燦芙蓉不至其  
地不解其詩也余庚子署新津唯堂爲學博及來榮已擢  
任教授今年七十二矣客貌如五六十歲猶生子素擅拳  
勇兼喜作詩九日登瀘山云瀘山矗立勢參天蠟屐攀躋  
萬仞巔百丈深潭拖白練四圍峻嶺羃青烟入林飛鼠爭  
枝跳隔岸漁船逆水牽石磴千盤何憚險放開眼界渺無  
邊

成都文殊院方丈智圓貌偉岸談吐磊落才畧過人初從  
白蓮教後悔悟投軍營設計剿擒匪黨賞六品頂帶久之  
棄去爲僧文殊院爲省會古刹僧衆二千指田租不敷用

揭債二萬餘金祠宇頽敗智圓入院經理有方不數年債  
累悉清更益田畝寺中逐處修整遂稱富饒召其子俾以  
巨金歸營產業優於自奉起居飲食無不精美特不茹葷  
耳方伯李石農先生高雅絕俗獨喜智圓暇日過從談論  
不倦諸當道亦樂與往還忽厭喧囂西門外自營草菴獨  
居邈與世絕人莫測也智圓通醫精堪輿論理氣透徹自  
古豪俠之士末路往往歸僧而其初或恣爲不法或入富  
貴場豪宕揮霍及其耽禪寂絕世緣迥異凡流智圓殆其  
倫歟

三台縣出北郭數里夾道柳百餘株登石磴半嶺有琴泉

寺憑欄以望江流縈帶林樹鬱然最後有龕鑿石爲觀音像泉出座下右一洞爲如此軒仰視岩石層層如雲出岫勢欲飛動左一小圓洞曰少商通泉流入小池伏地而出寺右半山一池曰涵清泉從龍口吐出注之靜聽點滴有聲如疎雨滴桐韻諸宮徵是名琴泉桂培園蔭邀書碩農何致菴程鶴山諸人往遊碩農題詩云會得宮商趣琴泉韻最工何人志流水此際送飛鴻古洞虛延月長松迴帶風塵襟一以潔不用更揮桐

榮縣東榮梨山慈雲寺中左右各有池池水僅可供炊寺外有似池而無水者深廣丈餘旁有洞口謂之龍洞舊日

禱雨輒應洞中有宋熙寧時碑入之僅容一人深不可測  
以燭照視四面怪石凹凸形如蚪龍前令胡水雲因旱往  
禱得雨時廖庶常朝翼在寺教讀作詩美之胡水雲依韻  
和之云隱非朝市卽山林同此憂民夙願深愧我兩人無  
善政羨君潤物有餘心九霄沆漑誰爲露三日滂沱忽作  
霖久旱神龍行帝澤馨香應許達幽陰由來循吏出儒林  
絳帳宏開歲月深時雨化人敷脉脉兄以養親不起選已  
在榮黎山設帳三年  
清風好我印心心默窺地軸誰憂旱俯順農情共乞霖全  
賴山靈昭降鑒良苗徧潤又微陰俗塵本不到園林况復  
山高徑更深今雨應談今夕事古風如見古人心生當



聖世非甘隱出比商臣期作霖民瘼相關應素裕綢繆何

敢待天陰高田尚未十分霑足擬雨足乃敬謝山靈千章夏木鬱青林獨惜高

原水未深甘雨連宵濡屐齒薰風卓午譜琴心時每晝大晴夜雨

田均祝登多稼小滿纔邀沛晚霖頽俗賴君能化導門前

桃李已成陰

節義文章萃於一門最爲盛事江安楊大司馬彤宣名鼎

和明季殉難其後科第隆隆而起晉與弟緒珣以文學著

稱晉子世麟振麟同舉康熙乙酉鍾麟與緒珣子符麟同

舉雍正癸卯錫麟子昂乾隆戊子鄉舉符麟子卓乾隆已

丑進士一時目爲甲族皆晉所教也晉以貢生終壽母郭

氏云七十已作古  
補傳八秩於今又六年任爾黃金高北  
斗誰家陸地有神仙  
扶行還厭鳩頭重  
佐食偏思野菜鮮  
獨愧窮兒空白首  
絲毫無力報生全  
清晨籲帝潔焚香  
子職平生事事荒  
何德能教母延壽  
降祥還祝日廻光  
肆筵賓醉霞光紫  
入座風飄桂蕊黃  
共說茲辰真曠觀  
一人須進一千觴  
母九十餘乃卒  
情真不嫌語質  
和林廣心八首  
尤見琢磨玉關休  
壯志緣野定新居  
籬繞王猷竹家藏  
李泌書灌園非學  
圃鑿沼豈貪魚爲  
愛煙霞靜浮雲任  
卷舒憶發扁舟興  
山齋小雪時菊纔  
晚徑梅已促新詩  
江水寒逾碧雲峯  
瘦更奇何當春色  
遍遠黛綠如睂莫  
怪新詩

富春來野趣多水生漁艇活草壯牧童歌耕犢侵晨出樵  
聲向晚過君家有如此不樂興云何咫尺風塵外翛然抱  
遠心步兵千日酒中散數聲琴宦業從冰冷侯門任海深  
故應車馬客無計得相尋漫說城居好邨居勝事兼高壩  
青嶂築小屋白茅苫節至花知報燈殘月解添莫令猿鶴  
怨厭苦又思甜新年詩幾束寄我不曾疎高話羲皇事頻  
談水竹居蹉跎慙我老鄙客仗君除何日清江曲誅茅共  
荷鋤正有重游興耘耔書老尙勤空懷林處士還憶李將軍  
射虎曾穿石揮金不論斤克家能惠好高韻幸頻分第五  
橋邊宅主人憶姓何名園邀上客蒲匳織天梭媿少風人

致空傳下里歌煩君爲掩拙勿遣雪兒調振麟即號二風  
作歌解嘲者卓字鶴然寄弟聲云別汝何多日春來淚未  
乾花明荆樹暗風煖春令寒不料招魂久空悲捧檄難高  
堂能強飯漂泊我猶安錦里分飛後艱難獨汝嘗冉駝蠻  
棧險瀟湘丙年荒憊矣阿戎力傷哉客子腸團圓如可待  
兩地裊秋香昂號雲屏春寒卽事云爲惜韶光恐易闌驛  
風作雨掩雲端王孫芳草留清露舞館笙歌怯早寒好景  
應題仍袖手荷衣頻着尙嫌單流鶯欲洩東皇意數嚙驚  
人倚檻看新秋對月云莫遣良宵寂寞過金樽綠蟻任吟  
哦蜍光映我明於雪歲序催人速似梭豈厭斯文遭薄俗

仍綠書劍却蹉跎年年此日尋知友惟有清風入幕多  
上  
周穆如明府培修安濟廟云臨江樓閣舊規模半峙江  
心一望孤碧瓦苔橫滋蔓草丹楹木蠹走蒼巖照山積翠  
浮烟靄清水迴波泛舳艫勝地得逢賢令尹不教古蹟廢  
荒蕪又有名維細者不知係其族否事親孝以孝廉爲灌  
縣訓導迎母就養以道遠不赴家信中有云一官匏繫親  
闈遠五夜鵲啼別淚多更覺入人心肺與晉壽母詩同一  
孝思也

榮縣僧文峯幼穎悟今年十六歲能作八比賦尤鮮秀間  
作小令頗可觀詩雖淺亦可造也寄雲空上人云孟山矗

蟲翠鬱葱遠隔塵囂路不通秋老金風黃葉外天高玉宇  
白雲中何時靜坐琴三疊有客敲門月半弓魚素傳來詩  
數首憑欄快讀似清風和雲空早涼云閒庭落葉早涼侵  
嘒嘒秋蟬助客吟崖樹影疎飛鳥下寺鐘聲斷暮雲深山  
間訪友時携酒村外尋花又抱琴飛錫再來幽徑熟青猿  
接我上高岑春日閒庭讀一疎籬小巷綠陰遮柳也斜斜  
竹也斜斜昨夜陽春到我家纔放梅花又放桃花呼僮汲  
水快烹茶雲在水涯日上窗紗獨坐閒庭興倍賒晨翻楞  
伽午開蜂衙夏日卽景閒亭日永如小年玉軫停絃小榻  
堪眠荷葉溪中疊似錢綠柳堤邊紅板橋前默坐爐浮晷

裊烟不是神仙誰是神仙園裏榴花火欲然蜂也翩翩蝶也翩翩文峯住觀音菴俗姓羅因無父母九歲披剃

相傳魚衆兆豐年雙流有魚似鮒而小生五箇溪自水草灘至四望關則有他處皆無味極肥美年豐則少歲歉則多天下事真有不可一概論者聞其出在八九月間相聚游行一網可得數百尾非關鱸膾感秋風味美難教處處同也似英雄齊入彀漁人一網盡牢籠鄂筒酒美奈魚何好向筒溪結網羅歉歲偏多豐歲少牧人占夢夢還訛嘉慶辛酉彭山城北大河之濱小艇偶泊漁人枕蓑晝寢似有喚其速去者驚醒登岸風馳雨驟烟雲晦冥有龍見

於空中鱗甲爪牙森然畢脩河水暴湧數丈噴薄如雷石  
子亂飛地近青龍塲觀者如覩隱約中見龍蜿蜒遊戲少  
頃開霽漁人覓舟則片板殘篙拋碎二三里外矣

簡州傅輝文字曉亭自號均溪老人雍正甲辰進士廣西  
鬱林州知州降河南太康令告歸清貧授徒自給年七十  
一爲生壙自作誌銘云少步青雲半生鞅掌國恩未報身  
歸泉壤其生也困其歿也貧惟餘清白以貽後人殆實錄  
也父名霽康熙庚午孝廉居官有善政行取主事曉亭承  
家學益精勤詩古文俱有名與林素翁云命駕出茅廬天  
寒木落初故人千里外別緒十年餘地有林泉勝村多水



竹居登臨興不淺筋力定何如夜月觀梅云君身自具神  
仙骨世外亭亭冰雪姿傳語小奚沽美酒安排對月寫新  
詩

蜀地江流分灌百萬頃江流所不至溪澗則筒車掣水未  
知始自何人其功可百世祀也張鳳翥作詩曲盡其巧兼  
著其始作之人錄其後半篇今年何爲吝神澤爲是筒車  
千輪百架阻武陽遏流屈曲注高阜編竹爲塹懸金湯人  
謀洵可奪天巧輓轆萬轉神功藏雪浪拍天雲水立銀河  
注地魚龍翔細珠亂落逗秋雨素練裂破拖電裳翻水叱  
咤轉鈞軸迎風嘔啞流徵商遂使東流向西注蒼龍倒掛

迴扶桑嗟乎翻車始自馬均手後來作者徒爭強搏躍過  
顙豈天性激行在山非經常徐侯解澤自公溥披星戴月  
求民康水縉百萬出泉畝豈使向隅含悲傷懲奸察弊走  
魑魅宣幽達滯含混茫天池一瀉三峽圻渤澥半倒九河  
襄菰蒲沒水鳬雁立動影窈窕空林塘迴前筒車聲婉轉  
潏迴激盪風浪浪江魚跳波白鶴舞江魚白鶴皆堤堰名金竹戛戛  
搖青岡金竹彭山堰名農夫歸路發清謳田頭放水補插  
秧手提桔槔明月下坐看水滿浮星光綠苗颼颼吹浪起  
一犁烟雨迎清涼晚來醉卧茆屋下不愁紅日昇東牆  
村居幽僻無名山大川以發人才思故詩多寒儉顧唐人

道田家風景宛如日觀在人善取材耳榮縣楊鳳鳴寫村  
景有可觀者幾處茅簷傍碧溪半居橋北半橋西牧童晨  
起同驅犢老婦晚歸各喚鷄擊鼓催農歌韻合挑燈課子  
讀聲齊有時客到柴門坐愛聽嬰兒噉噉啼選得幽居傍  
翠巖鴈鳩穀穀燕誦誦花鋪曲徑風難掃苔滿荒階草未  
芟雨後耕田携破笠溪邊泛水缺輕帆此間想與桃源近  
鷄犬桑麻迥絕凡非隱居久者不知此景

李濂與何人鶴交莫逆乾隆四十九年人鶴自山東泰安  
署侍母還德陽李掌教孝感書院以書詢之云東遊四載  
所樂何事答以詩云東遊何所樂殊費故人思萬斛蓬萊

酒一瓢滄海詩友朋雲聚散歲月電奔馳歸卧墓山下空  
添兩髻絲詩雖淺頗有情趣得古人贈答之義

余來川與大竹王魯之相見厯下時將赴安邱任忽忽一  
別音書頻達四弟薇堂在青州與魯之會往大竹與小雲  
會小雲貌寒儉不及乃兄而落拓不羈畧相似魯之調繁  
長清小雲往視未幾病歿魯之未久亦卒可惜也江太史  
國霖與友搜其遺詩得魯之待鶴樓詩小雲零礫詩存合  
刻板存都中此舉庶不沒其心血魯之在東嘗畧蘭山卽  
篆留別父老云半年懷慄卽垂腰瓜代猶欣髻未彫往日  
秋城迷暗雨去時春月滿清霄幾曾白壁遭泥浣但見黃

金似雪消蔣琬畧陽殊不治大端難得耐煩囂風塵終日  
學蓬飛蘭地方百里而當孔道勘驗送迎殆無虛日五斗何能便療饑深累慈

親添白髮却憐小女索新衣賓朋見諒間過少役吏相看  
逐漸稀不道縣衙如冷寺時人歎息轉相譏回頭失景已  
無痕往事捫心仔細論未得暇時親父老也曾怒後杖兒  
孫籌邊自愧催科拙他縣皆完額蘭不及十之五斷獄方知禮讓尊我

本無才安靜好匆匆於汝有何恩出城腰脚頓成輕惆悵  
方增望雨情秋後牧羊山草盡春來聞雁夜愁生貧吾分  
耳民何蹙勞本當然政未成行矣那須名赫赫祇慚負汝  
負生平小雲在濟南登滙波門城樓云百丈飛樓接渺冥

鵲華秋色滿疎櫺雲連大海千山紫天落平蕪萬里青烟  
火人家迷遠樹斜陽鴉影落前汀昇平一例登臨樂自有  
蛟龍夜未局

成都張益在榮膳寫書啟偶見其咏懷云亦向芸窗化魯  
愚文章報國已全虛深慚乏計恢先業且喜偷閒讀父書  
敢冀良田兼廣舍惟求粗飯與茅廬閒來靜倚東籬想異  
日兒孫莫效予雖未工要能道其心事

山陰陸敏齋嘗以詩冊相示余有商摧應時更定少年俊  
爽敏而好學者也其室篆仙亦好吟咏于歸時敏齋贈詩  
云最愛芸窗來伴讀青檠常共夜三更可謂佳偶來川遷

父柩還里途中夫婦相繼而亡哀哉

山西劉範九觀渡來川候補喜作詩到處留題常以未登  
科第爲憾余邀遊武侯祠與諸友小飲賦詩云攜琴客到  
錦官城抵掌高談感慨生酒後交情無俗態詩來唱和有  
同聲川江自古稱爲險蜀道於今恨未平愧我中年多坎  
坷羨君榜上早題名曲徑迴環萬綠稠武侯祠裏會名流  
高風醉我陶元亮大志懷人馬少游取友豈徒歌贈紆爲  
官最快是同舟吟詩力欲追工部剪燭歸來又唱酬範九  
後以耳聾歸里

道光十六年秋余署鄧都孝廉余禹門兆登與乃兄邀遊

鹿鳴山東坡先生舊遊地也自後文譙屢開鄧篆時贈詩

錄二首家世瑯琊舊官聲枳水新旻裘廉厲俗姜被暖分

人素友愛恤下鞭停響虛中鏡拂塵此行留愛日風景負

暄辰素仰風規峻焉知雅興饒晝閒衙早放夜作市無繁

携展名山問啣杯皓月邀碧紗留句好追琢壯岩堯遊平都觀

作長古去詩中未免溢美存之志當日雅意耳

黃卓園樹本由教職保舉歷宰豫閩垂二十年以將樂令

復改教職選簡州訓導余嘗因公至簡相見自云安閒勝

于爲令時鎮平述懷云久將兒女視蒼生不爲身家豈爲

名贏得虎狼皆自斂等閒鷄犬不相驚風清四野渾無事



花落閑庭靜有聲撫字敢云心獨瘁一官早已薄蠅營鄉  
徵道出萬安寨步秦板橋韻云水聲汧汧不通船山徑迷  
離起夕煙頓覺眼前無善地全憑頂上有青天鄉徵未必  
如民願閩省錢糧非官親徵不得排糶偏能結眾緣甲午水潦民飢予請排糶接濟事後  
民爲立碑將樂三年何日樂歸心已被白雲牽燈下有感云宦  
海飄蓬幾度秋瞞瞞黃髮已盈頭未知單父琴何處漫說  
河陽花尙留苜蓿儘堪誇石隱桑榆無復夢刀州敲詩酌  
酒消塵慮好把忘機狎野鷗卓園祖父皆官四川後入興  
文籍家有園亭之勝自閩歸里付子經理携姬侍三人赴  
簡州任吟咏自適

宜賓尹大參子求性兀傲工詩前人有句云閉戶焚香尹  
子求其高雅可想女紉蘭亦能詩嫁劉晉仲諒素不知書  
晉仲妹文玉詞翰工敏乃從學詩年甫十九卒子求友爲  
作斷香銘極悽惋可當詩序讀也中有云精神起落出人  
意表佳處不必由思思者反是無關係處嘗從晉仲由江  
入峽由峽入淮達運河竹樹逢迎煙日爭讓舟行遲緩可  
以爲家得一意爲詩其篇時斷時缺缺于此或全于彼有  
絃摧柱折援他琴以續之之意讀其詩骨散神寒音節清  
越如病葉偶然從風而墜或中搯之附枝翅鳴不能自致  
于地如暗泉之阨于石而不能自竟其響此斷香之旨也

世不常有才才而爲友難才而爲婦更難劉子者憐才乎  
求友乎悼亡乎將尋香于落葉暗泉之間乎詩未多傳夜  
坐吟云漠漠長空似水清金波滑淨月輕盈微風半夜添  
衣冷弱柳千枝帶露明滿院春光鎖不住一番花信爲誰  
驚沈吟永夕愁無緒金鵬寒窗畫竹橫

廣東諸生伍燕堂遷蜀綦江在城中教授生徒典史某嘗  
至其館談論見其工詞翰每假手焉適縣令書啓友去典  
史薦之入幕每縣試令以文卷送閱爲定甲乙相信不疑  
凡經七試有人欲得案首賄以重金堅却之是時偕妻食  
貧尙無子年四十後連得三子教之讀入綦江籍縣試皆

第一俱中進士燕堂已受封今年八十餘猶健在七十九  
歲時繪流觴曲水圖大竹王小雲題七古甚長中有云瀛  
山先生七十九其才其福古未有著書不讀時世書積功  
積德兩不朽書田種得三株樹枝葉披雲承雨露又云我  
聞瀛山山水好山水環曲似蓬島大奇山水爲人生江山  
萬年人不老惟其器量宏不貪小利故能載厚福豈偶然  
哉

余幼與南川周東泉治章侍家君共讀攝篆榮昌東泉來  
遊未久別去畱別七律今于故紙中忽得其稿相別鷄窗  
歲月深髫齡華髮再相親鬚眉細認疑前世車笠尋盟繼

古人詩禮相傳會共侍關山幸聚有良因蜀邦風俗顏頤  
甚仰賴循良有脚春時在道光乙亥

鄧都學博鄒小山桂林好爲詩別後三四年屢寄所作畧  
錄三首桃花如錦柳如烟暢好風光二月天曲有新聲思  
白雪家無餘物祇青氊乘間覓句惟排悶遣興啣杯且學  
仙常歎人貪丹鼎術不知何用歷長年當年慷慨賦騷歌  
意緒如絲喚奈何載酒同酣黃葉徑回舟尙憶白沙沱人  
非有骨終隨俗友果能眞不厭多此際陽春曲應譜來秋  
准擬聽雲和

餞別時舟泊白沙沱痛飲至  
夜明秋報滿進省先爲預訂

眉州舟中早發

云澄流如帶羃朝烟浩渺眉江別有天山色四圍青似黛

蘆花兩岸白於棉舟橫古渡人須有橈劃輕波水作圈最是河洲無限好還疑隱處有真仙

南溪令彭海樓旭初需次省垣遨頭日偕遊浣花集香葉亭分韻賦詩余僅作五古短篇其餘人各一首海樓分得和字獨作五律四首雨歇春歸盡晴初天氣和名祠諸葛仰舊蹟少陵哦柏翠古牆蔭苔斑幽徑多錦官城外路不厭數經過丹房清似水香葉小於窩綠竹涼陰聚黃冠笑語和草生書帶滿花結米囊多檢點新聯集頻將好句哦浣花期又到濯錦意如何女手纖纖荀僧衣葉葉荷遨頭臨晏會夏首際清和莫更求陳迹竒聞自古多捧檄剛氏

客

時紅樵有剛氏之行未與會

茲游未克過詩儔驚漸少吟興減前多

別意滿楊柳夕陽生薜蘿人歸禽鳥樂下上哢聲和

昆明傳順孫明萬厯間宰德陽治解後蔬圃鋤地下有聲

如震金石掘丈餘得古鼎高三尺五寸厚三寸兩耳高五

寸龍虎雕畫細入毫髮其質非鐵擊之似石丹砂斑駁鎔

之得黃金百餘斤疑許真君鍊金代民輸租埋鼎地下

有李坦者過榮投書云原藉山東萊陽遷居他處經此求

資助且題詩中有句云滿腹苦情嫌紙短一江秋水共愁

多蓋素係遊幕之人由陝將返於南情詞悱惻稍贈路費

免其窮途之哭

雍正間河南柘城寶容遂號樗村以孝廉宰蜀之新寧以  
聖賢爲可學多惠政錢香樹宋青立其素交也寄以詩樗  
村答之云謁選入承明僕邀畱眞面相期在千秋汲古廢  
爐扇脂葦關茸耳虺蜴愧生汗作吏逾三載拊循事未半  
猥囂禮義舊悚惕廉恥現白岩插青霄岩渠穿幽澗石室  
渺難追銅章危如棧招徠近百年恬熙仰  帝眷三月春  
色深履屨郊原盼萬里一勞人考績寡所見悵懷望知己  
石棧峯烟斷何日邀舊遊曲江重開醺樗村著禮義廉恥  
四箴大堂楹聯云嘖笑間可識兒女眞情誠求未至敢云  
無不是的父母正教內自具權衡妙理稱量得宜方信沒



錯斷了分毫觀此其爲官可知

青立山東人後亦爲蜀中縣令

隴西汪鳳喈彥昌以諸生援例得佐貳來川候補奉委至  
榮時鏡香亭外荷葉田田邀客譙集各賦詩卽贈其行廖  
庶常扶九云相對清談愜由來盛會難張孝廉海雲云案  
無畱牘官常暇座有嘉賓句易聯鳳喈卽席和云翠潑修  
篁似綠天鏡香亭上色尤鮮滿樓風打蕉窗雨一局棋敲  
竹徑烟紅友知心誰是伴青雲得路我無緣明朝分手何  
時會刻燭催詩醉別筵余作五古復和其七律結云揮毫  
落紙才均妙雅集西園是好題

南江楊冠山廷賢六歲從中江孟鷺洲都憲學有神童之

目十四歲以詩寄袁簡齋于隨園稱其寄抱宏深格律雅  
正奇文妙句卓卓可傳後從梁山舟侍講學繼而交遊愈  
廣王述菴吳穀人王鐵夫皆其師資與張亥白船山唱和  
更多在都館諸王邸第皆以國士相待自少咸謂掇科如  
拾芥後養母不出以貢生終教匪之亂曾爲賊擄逃出獻  
平賊十七策于大帥多采用感事云西川盜賊起潢池道  
路驚看羽檄馳開府正宜憂使節果州忽報駐前師事機  
到眼嗟無術參佐當年坐誤誰至竟妖氛連八郡萬民疾  
首痛瘡痍香爐坪下結連營坐見奇功旦晚成抗手竟甘  
尊賤隸善刀終致失長鯨朝廷僅免誅餘孽寇盜寧堪與

質盟常惜往時賢令尹空談經濟博清名騰騰殺霧蔽長  
空潦草傳聞幾異同惱我鄉心空歷亂有人勲業在朦朧  
無根氣燄看身後已盡功名只夢中一樹鷄棲誰耐汝早  
清賢路讓英雄嘉陵江岸路如何頓使乘虛賊騎過已見  
傳烽聯錦水更教守險失潼河烏啼山市行人少鬼哭春  
原戰骨多築寨連營屯殺氣驚心故里盡橫戈繞避戎車  
又餉車崎嶇征路八千餘余方奉母由楚赴泰州官廨難逢閫外知兵  
將自演胸中遁甲書一戰何人揚義勇亂山勞我祭孤虛  
連營漫阻星奔客狐火狼烟要掃除三川遷徙日紛紛苦  
鴈哀猿不可聞七戰連朝擒巨寇中宵萬馬蹴重雲龍驤

過處看扶耒虎衛同時幾策勲  
潼夔成綿禾稼遍安全都  
賴德將軍楚塞風雲望杳然  
旌旗迢遞接秦川 九重霄  
叶期朝食萬里輿圖歸版田  
民命已傷遭劫火天心好與  
靖烽烟 高宗皇帝聲靈存厚澤  
深恩六十年水塘漱澗  
待春耕轉眼東風布穀鳴原上  
繡旗寒有色樓頭畫角夜  
聞聲沙塵未靖三川路征伐猶煩  
七省兵欲識天狼仗弧  
矢莫教輕議受降城秋懷云秋  
野傷心擁翠嵐他鄉作客  
意誰堪蟬聲斷續驚愁夢山色  
蕭條映遼潭萬恨注胸虛  
歲月孤身無主任東南何當馬革  
將尸裹不愧生爲一世  
男故園西望亂山平幾曲嘉陵繞  
縣清人戶百年增萬口

卷一  
三  
刀光一夕賸孤城思鄉遠有流亡屋赴急全無訓練兵落  
落親朋誰好在他時攜手盡餘生同張船山登黑窩廠秋  
眺晚歸云莽莽荒臺墓景沉城中原自有山林到來頗動  
耕田想高處能灰住世心萬點人煙通日氣一行峰勢抱  
秋陰凌空鸞鶴應相笑回首塵緣誤已深

曾國光號六賓簡州舉人教授生徒多取科第以去著有  
耕雨堂詩集春日山行云古寺寒煙鎖朝來策杖過銜泥  
歸燕重冒雨落花多徑小眠人柳村深茂女蘿微風林際  
動隔岸聽樵歌城南小遊云錦官城外柳條新滿目青青  
不染塵忽見流鶯飛集處淡煙嫩日十分春偶感云年來

豪氣盡消磨淺水因風忽起波自笑不如江上客月明漁  
艇卧披蓑

此君軒宋時道士王元公所書黃山谷爲題詩刻石今皆  
不存後人於文昌宮立軒題舊額隔牆修篁蔽天梅樹五  
六株余偕朋好冬月探梅諸生多從遊者相與賦詩劉西  
屏德剛作七古海南仙人神皎皎手携明月下瑤島不傍  
湖山處士家亭臺巧住色逾好我生本是幽閒人每見癯  
仙便傾倒衝寒風入小陽天定有南枝開放早安排紙帳  
尋花來跨驢犯雪蹋瑤草山腰斜上路迴環小小雲軒修  
竹抱花光四照玉顏開凭欄獨立心如擣美人不來天欲

暮辜負金樽徒煩惱風發發兮雙袂寒老鶴斂羽形容槁  
我別瑤臺近幾生不知王母首盡皓羅浮鳳子忽飛來扣  
門仙子衣裳綯一聲鐵笛玉龍驚雪海茫茫香浩浩猶憶  
攜鋤月下時護惜慇懃如至寶於今冰魂濯冰壺玉骨不  
藉秋水澡驛使難逢林和靖夕陽庾嶺隔古道何時相伴  
玉堂春手折一枝插晴昊黃吉泉浩作七律尋花未及百  
花開且面高軒共舉杯詩記涪翁題句好人如逋老賞心  
纔情移雪後還霜後夢繞山隈並水隈恰與此君長作伴  
一枝斜處許徘徊嶺上飄風陣陣寒小園人倚舊闌干暗  
香隱約春何處凍萼扶疎露未乾紙帳夢清畱鶴守板橋

路滑策驢看空山早裕和羹略顧影何嫌氣味酸楊峭峯  
聯拔作七絕瓊姿不合住塵埃應向僧寮肯雪開遲爾商  
量新紙帳安排詩酒共追陪此君軒外偶盤桓冷豔端宜  
冷眼看玉立亭亭仙骨瘦名花原不厭酸寒

故金川地改爲屯編戶如內地商賈至其地無家室納金  
頭人或土司得夷婦爲偶若他徙或歸里仍還原主謂之  
租婦打箭鑪雜谷關一帶則租婦定價立券有年限限滿  
還原主欲畱則再議價立券邊地蠻俗然也蠻娘租就券  
塗鴉野宿鴛鴦似在家屈指瓜期年已滿還將清淚滴琵琶

登



邊屯盡夷人驍勇善鬥婦女亦喜談兵聞征調皆踴躍行  
兵西域甚得其力猓猓長身多力獨畏屯兵其悍鷙可想  
爲賦詩云蠻夷大長列團營故壘蕭蕭草木兵恰好從戎  
歌板屋

夷人皆以板蓋屋

婦人咸願請長纓

湖北江陵武舉王紹先生女兩歲忽言前生家在沙市父  
名長仁兄名克忠時沙市王長仁女歿二年間之遣其子  
克忠來視女一見卽呼爲兄問篋中銀猶在否克忠茫然  
歸檢女篋果有銀二圓女素所玩也乃請接至家長幼無  
不識者兩家共撫之稍長聰穎異常書畫女紅無不精嫁  
楊敷瓚爲妻遷蜀隸中江子孫皆有聲庠序女言初生時

有白鬚老人送之道閉雨霏霏濕面入門卽迷卒年八十  
有七

與文諸生黃相堯號廣堂送方少山南旋云解組飄然出  
益州尊鱸遙望峴山秋高風雅有煙霞癖素志原無富貴  
謀婚嫁未完歸便得功名已遂復何求好將蜀國佳山水  
並入新詩記勝游戎州官廨懷從弟貞一云風雨聯牀興  
正踰垣簾今又各天涯飛而食肉應投筆醉不成歡只點  
茶往日熱腸憐雁影昨宵好夢繞荆花懷人怕見更深月  
一片淒清映碧紗又如驢足稍遲人一步牛衣又困我三  
年落葉五更繁客夢飄蓬千里使人愁有書範我才爲福

無事紫心便是仙皆佳

農桑漁樵生民之本業亦村居樂事也彭山唐景勲詩云  
鋤罷嘉禾憩樹陰油雲遙指起遙岑急忙呼得小兒女箬  
笠蓑衣趁早尋祈蠶登鼓鬧里間爲祝馬頭競往還記得  
年年三月裏鶯聲百囀聽間關袁楷云打鼻山連鼎鼻山  
樵童絡繹野棠灣一肩紅葉一肩雨遠遠岡頭任往還袁  
懷琄作漁家竹枝云夜泊春江短竹籬船頭燈火晚風吹  
半篙明月半篙水掩映桃花四五枝幾隻漁船欲翦波漁  
人唱罷放船歌二郎灘下波聲急輕理蘭橈緩緩過花港  
層樓隱翠微行人絡繹過漁磯山頭共打黃梅熟江上爭

提紫蟒歸烟街一帶掛青帘亞字闌干倚畫簷爭解腰錢  
沾酒飲登盤鮮膾撒花鹽

健爲李義峯先生拔詩古文光明暢達望而知爲正人爲  
荆宜施道時有婦攔輿泣訴云其夫兄弟二人夫亡方懷  
孕及產視之男也須臾暈絕復甦再視則女驚問皆謂所  
生本女反以所見爲妄心終不釋厯控縣府各上憲不得  
伸夫兄惡其擾累鎖閉一室今始放出察其詞色似含深  
冤乃微服查訪漸得根株蓋家本鉅富夫兄慮婦生子分  
其產業知佃戶某妻亦懷孕先一二日生女賄以重金乘  
婦昏暈易之至是訪得其子猶在佃戶家提訊得實詳撫

院撫院謂案已屢經訛結若翻將置各官于何地先生堅執不移遂參劾罷職及差官往湖南查訛裁峯托所善陝客探何鋪賣金于何衙門登記其數越站先迎 欽使歷陳婦冤并以金數呈閱云某某將以行賄及訛佐証吐實寃始白各官皆得罪去先生此一節真不愧讀書人不愛一官力伸匹婦之寃雖官終不復子元模中進士孫四人二進士一舉人一援例今皆爲縣令天何嘗負人哉當時不令元模出仕慮懷嫌者多也第四孫名漣嘉慶己卯北闈中式題爲君君臣臣父父子子文中反處有云如何則君道乖如何則臣道乖凡四乖字人戲呼爲李四乖乖

堯洛川學問淹博詩亦溫雅嘗由重慶到榮縣作詩云馳  
驅辛苦自年年浪迹東西徧兩川彈鋏人來千里外當頭  
月又二分圓新晴不厭花間醉舊雨都成海上仙石壁刻詩梅生  
先生及竺山竹友均歸道山矣試向鏡香亭畔立綠波如夢柳如煙游大  
佛寺云勝地初游選佛場登高望遠極蒼茫環溪水暖飛  
紅杏繞郭煙生隱綠楊竹葉攜來成好會旃檀爇罷冷空  
王歸途回首憑闌處仙梵微微出上方

西樵先生鍾山秀才詩爲達縣李研齋長祥作李公崇禎  
癸未探花以翰林屢建奇策不用仕福王展轉兵戈國初  
猶在忠義可貫金石其娶鍾山秀才世但稱其色藝不知

文章節烈亦著當時有人贈研齋詩云十載江湖隱釣磯  
跨鞍絕塞欲誰依草荒白帝家何在瓜熟青門事已非著  
作千秋身未老悲歌萬里客將歸并州風勁霜如雪送爾  
離亭淚滿衣慷慨悲壯足寫其平生不著姓名想爲明之  
逸老也研齋古文自成一家鍾山夫人著有海棠居集黃  
錦生讀之有感題詩云閨閣有名媛號鍾山秀才文章綠  
性著節烈自天開染翰珠璣落揮毫風雨來可憐貧老蜀  
淚盡一心灰研齋文恢奇古宕惜未見海棠居集

康熙丙戌灌縣孟洞溝有物如二牛相鬥山爲之崩橫截  
谷口水不得流者三載逆上七八十里瀰漫爲患戊子歲

保二處近岸居民夜夢神告以大水將至速徙避多遷他處未幾水決高八九十丈城郭衝塌至灌口尙湧起三四十丈見有人騎白馬於江中指揮所漂木石壅塞離堆堰口水遂趨外江東南下成都數十州縣不至漂沒水未發時居民皇皇遷避灌縣張其彩與妻素孝入告其母母方病卧曰我病如此避水亦死汝等速去勿以我爲念其彩死守二日晨起見烟霧四塞江聲如雷其彩夫婦扶母登樓水至并樓衝去母子相失夫婦浮沉中呼母不絕聲漂三十餘里河分數派夫婦落沙洲母以病歿於水未幾屍亦漂至洲旁昇歸以葬人以爲孝感所致而神之威靈庇



祐亦顯赫矣

王蒼水懷遠將軍三峰之仲子穎悟絕人年十七拔入成均字體遒健有右軍家風於米家山水東坡墨竹皆能闖其間奧尤嫻武事馳馬彎弓射必中的善短刀手持著作刀令營卒攢刃擊之莫能及身復以箸擊人約曰著衣爲中力撩腕剪顧觸手分披將弁咋舌愧服蒼水亦以此自豪解衣磅礴顧盼偉如也顧晴臯臯使聞其才招畱數月蒼水隨父在邊久洞悉夷情時當金川用兵慷慨進攻取策聚米捫虱豪氣無敵終以格於儒官不敢薦吳白華學使深竒之尤賞其鎗法作長歌贈之云泮宮先生將家子

印龍鈴棄如屣學書豈爲記姓名游宦無煩去鄉里剛  
底學舍低打頭終朝一餐冬一裘關尹五千雖有待門監  
七十更何求自言少學一人敵日高超距夜鳴鏑金梢飛  
鼻雪鋒寒滿樹梨花影團圞去年風鶴到成都烏府相邀  
禮數殊恥遣尺書招贊普願將寸組繫單于君看鎗法通  
兵法進攻毋狃退毋乏守已先從養氣參乘人轉爲忘機  
洽落雁軍聲京國來拂衣歸指講堂開挽強空負顏高譽  
倚重曾需劇孟才弓腰怕首舊裝束久戴儒冠辭部曲虎  
魄當杯爛漫紅苔紋遶砌森沈綠蠹簡叢殘霜鬢深陰平  
閣道幾登臨但尋黼黻卿雲手莫論衙官屈宋心蒼水名

世沛巴州人官平武教諭

達縣黃龍寺荒園中有巨鐘約重萬觔視其文宋慶元五年鑄官階列承議郎判達州軍事賜緋魚袋宋伯堅朝散大夫權知達州軍事翁子中銘者爲馬景修詞亦超拔非俗筆羅公思舉爲副將見而惜之懸諸寺側其聲清越異常王良佐爲作歌云南宋北巖古院鐘何年墮落黃龍宮蒲牢塞口海鯨遁虎章蝕土苔花封俗說飛來此常住金仙默受山川護水火刃兵厯浩劫升沉用舍皆關數佛法隨緣緣未至我來歎息棄廢地同行拂拭考遺蹤厯厯當年慶元字宋室金甌已半缺西湖遊嬉猶泄泄中原鐘簴

久忘歸誰恤沉淪一州鐵摩挲故物六百年竊欲假手樓  
中懸空持寸筵無大力何由動地聞于天是時井鬼揚兵  
氣荒荒落日孤城閉東關崛起羅將軍喜爲茲鐘賀遭際  
將軍好武兼好古震世功名勒鐘呂揮戈淨掃諸路塵建  
節榮膺故鄉土雕弓畫戟領健兒水可使立山可移指揮  
長繩拔地起大叩大鳴驚聾癡神物久埋荒草畔提攜無  
人空嗟歎一朝噌吰遠邇驚質重形奇羣爭看從今永伴  
潮音吼不聞鼓聲息刁斗新銘記石舊銘金駿烈鴻聲同  
不朽按鐘舊在北巖寺宋太平興國敕建護國禪院也不  
知何時移黃龍寺李研齋北巖寺鐘鼓樓記云流賊之亂

焚滅皆盡北巖惟荆棘鐘鼓不知何處矣是寺已無此鐘之証又云今甲午三月六日夜忽有若鐘聲來城內越一夜又然其聲若北來聽之在北巖寺相與往視惟荆棘爾此事頗奇附記之

資州李慶先字景蓮博學厲行以歲貢選西昌訓導不出所居曰東里有鳴鳳園居其中吟風醉月徜徉山水縣令王裕疆往遊園亭作七絕十首讀其詩想其隱居之樂一路溪山步步幽遙青近綠遠西疇稻花香撲行人鼻愛此莊前萬頃秋傍水倚山李氏莊樓臺一半照池塘行來不覺驚鷗鷺飛入荷花深處藏炊烟漠漠接雲生碧翠陰中

犬吠聲最是驚人橋畔石儼然立起欲逢迎曲岸朱欄抱  
一灣板橋暗渡水雲間相逢未及分賓主一笑無言且看  
山庭軒高敞勢凌空四面幽竒一覽中莫怪俗塵飛不到  
由來此處古淳風不愛朝衫愛布衣歸來巖壑自相依無  
端榮辱渾忘却閒看長空任鳥飛從來世事等浮雲識破  
機關誰似君吟罷新詩還自寫花前月下總微醺長松百  
尺蔭高樓萬軸牙籤於此收三四裔孫年六七衣冠端坐  
誦春秋潑潑池魚出水鮮家藏陳釀已三年頻斟滿酌須  
與飽綠蔭芭蕉窗下眠老夫自笑興如何畱戀西園風景  
多若使主人長好客從今一日一回過

馬邊廳舊爲馬湖府因馬湖而名馬湖在廳南一百七十里今屬雷波湖在山頂長二十里廣七里四圍峻崖中有山如螺去江二里水與江同消長日夕作潮昔人以馬繫湖濱龍與交產異馬行如飛電與大宛之馬相似此馬湖所由名也明洪武時明昇獻十馬其一白色長丈餘不受羈勒祀馬祖囊沙四百斤壓之令人騎行苑中漸馴賜名飛越峯殆龍駒也郫縣孫瘦石曾得波斯馬四蹄如鷄爪腹下有鱗形狀詭異而行不及千里惜無以馬試于湖者瘦石老馬七絕甚佳淋漓汗血九花侵老服鹽車歲月深芻豆不充筋力盡他年朽骨待黃金

蜀地蘭蕙最多肩挑販鬻價甚低而素心異種究竟難得  
升菴先生嘗至廣通響水關見所產蘭綠葉紫莖春華秋  
馥云楚騷所稱紉佩者卽此人家盆中所植乃蘭之別種  
蓀與芷耳馬邊又有所謂雪蘭隆冬雪中盛開四川他處  
所無恐海內亦少此種咏之云荒山雪片日飄蕭邊地嚴  
寒草木彫獨有叢蘭花正放翻憐松柏慘無聊淵明籬菊  
久摧殘和客荷裳佩亦單誰識國香冰雪裏梅花風格共  
清寒

李雄飛巴州人國初爲陳德門下客德總大鎮好客養士  
門下食客常數百人雄飛美丰儀善談論博學多能德盛



加禮稱爲先生一日譙所部將士酒酣曰我輩張弓挺刃  
雖叨祿秩實愧目不識丁吾家各有子弟何不使之讀書  
卽以李先生爲師皆曰諾李在軍中每聞戰鬥輒惶駭惕  
息得教讀樂甚久之子弟恂恂將佐皆喜會江南有變德  
帥師平之將弁獲女子蔡氏國色也獻之德德見其丰姿  
絕世氣度嫺雅命送太夫人所眾以爲殆將納之踰月德  
集將佐曰前獲女子吾以爲必善女紅今老母謂其一無  
所能以配將士無所用當擇無用者偶之皆曰諾德曰今  
軍中無用者孰如李先生乃豐其資粧以配雄飛諸將皆  
執賀焉後雄飛順治辛卯鄉舉官山西蒲州蔡氏

封直人

富貴置造園亭取快一時未幾付之荒烟蔓草徒資憑弔  
樂至南有黃花園明大僕黎堯勳性愛菊故以名園今惟  
平原綠蕪村人掘土或得鼎彝尊勺金釵明珠銅甕古器  
雕鏤精巧當日賓客冠裳美人歌舞之盛從可想見城南  
有鮑家園明武陵知縣鮑儀山莊林塘幽媚兼窈窕崎嶇  
之勝石坊左場右石柱猶存橫書魚鳥親人四字末書崇  
禎己巳儀有詩云不許塵飛逸興偏此中風景勝壺天徑  
邊僻地宜栽菊門外方塘好種蓮花色四時春富貴酒香  
終日客流連主人自得陶公趣心事攜存獨樂篇唐永憲  
訪其園題詩云山外方塘昔種蓮批紅判白費吟箋親人

魚鳥曾經亂記得崇禎己巳年動地三邊戰鼓撾難從此  
處傲烟霞溪山換得灰如墨鬼向秋墳唱鮑家

成都教授朱蘭臯保薦入都作七古留別諸詩人用十蒸  
韻效栢梁體洋洋巨篇趙竹菴持以示余屬和率筆應酬  
不存稿蘭臯本江南上饒人高祖名儀字象先崇禎間進  
士爲嘉定州牧流賊圍城勵士民拒守以草灌油擲賊焦  
爛城墮復完者再力竭食盡賊陷城放火公朝服登堂囑  
其子命錫勿爲賊屈命錫請先死夫人自屏後出曰父子  
死忠孝妾何以生爲以簪刺喉死公北向再拜自焚死蜀  
碧未載其事道光四年蘭臯以狀上制府爲請于朝得祀

鄉賢列名宦焉邗縣孫子臯作傳兼美以詩錄二首脂蒿  
投烈炬城陷版重完倘有偏師助能將大敵殘成仁今不  
易殉節古來難異代嘉州路中達白骨寒縱火公堂日癡  
疣血戰秋丈夫原志士巾幗亦名流幸有熙朝贈重看偉  
節畱江關應廟食功不下封侯大節幾晦著於後世子孫  
能表揚其先人以文章宦業世其家不可謂非天之報忠  
臣也

宋梅生太守與前榮令許君源教諭郭君杰惇及諸友鏡  
香亭聯句刻詩於石並載縣志杰惇誤書惇杰時在丙子  
嘉慶十一年也縣志卽許所修殆書手字誤紀之以待更

正按郭君巴州舉人有妹名蓮姑嘉慶七年九月教匪陷巴州擄之去蓮姑罵不絕口賊褫其衣罵愈厲賊怒殺之書烈女屍三字於背棄路側郭君於五年到任蓮姑在家故及難陸古山光宗風雅士也詳請旌表榮邑鄒孝廉學山與郭君唱和詩最多未表揚及此吟風弄月流連山水何如咏歌此事流芳遠邇乎

劉燕庭先生由蜀臬擢兩浙布政吾東諸同鄉約送至新都往遊桂湖約五六畝荷花猶有存者南岸堆土爲嶺排植桂樹東爲升菴先生祠劉玉坡藩憲懸聯甚長不復記先生故宅今爲典史署王阮亭典試經過見雙桂尙蜚蜚

兵火後化劫灰矣故物餘石榴一株升菴夫人黃氏咏庭  
榴云大荒西域種原奇第一緋英上苑姿不到秋深丹結  
實獨于夏午豔垂枝已嫌桃李開何早畧笑笑蓉發亦遲  
萬點落霞明照眼綠衣金屋正相宜榴迨今垂三百年大  
可合抱根出土二尺卽岐爲兩一卧地屈走復人立高出  
簷際一柯幹夭矯如龍五月開花至十月不絕輪南少府  
爲之記琢石承其四隅高蔭山比部命工繪圖石屏朱丹  
木孝廉作四言詩多和之者孫野雲鎮作七古一篇甚長  
節錄之云始康縣治桂湖陽舊是升菴雙桂堂香名屹立  
三百載桂失其傳無由詳老榴一株發光怪偃僂螭螭相

扶將奇根迸逸裂厚土高柯結屈穿石牆闐然出地方三  
尺同本離立身昂藏一枝偃蹇形惟悴有似遷謫羈遐方  
一枝作勢自振拔風前鼓舞如龍翔花開仲夏越陽月珊  
瑚火齊交輝光及見公家全盛日腰金袍笏方盈床風霜  
閱歷歲月古兵燹不死神衛防老幹總分名士氣古香如  
接丈人行盤根輪囷溯長養栽培不藉人力强羣公花前  
雜考訂詩文磊落爭軒昂公昔嚴遣赴六詔花開不得歸  
故鄉綠野堂空秋草遍烏衣巷冷白楊荒異代相知還我  
輩樹猶如此人何傷噫嘻樹猶如此人何傷

內江楊瑄字伯琛好讀書喜吟咏遊成都士大夫多與之

遊方伯劉公清廉至徐都閩處見徐題壁詩有云轅門久  
綰將軍印甲第高容駟馬車心異之徑往訪焉閱其懷歸  
詩云嗷嗷鴻雁常爲客小小蝸牛尙有家間中遣懷云鑿  
甕有天常自樂立錐無地且安貧又云閱人老眼湖山外  
避世間身草莽間深加禮重將欲薦之辭歸閉戶不出  
裴宏周忠臣或以爲四川人復以資州之龍洞爲公讀書  
處其地險遠四圍壁立入雲霄山麓飛瀑掩映佛龕數武  
危厂聳出作蛟龍蟠拏狀岩石隆隆特起若鳥跡若蛇篆  
若玉檢金泥書不可句讀其中崕岬瀕洞砭骨寒肌仰視  
石苔嵯嵯乳泉湧出如匹練下垂承以白石高二尺許下



廣上峭中漥如釜蓋水花融結不知年歲也折而北尋源  
入峽口梯而登石垂繩而下入洞洞高三丈深數丈外有  
龍潭焉四壁蒼翠飛泉下注雷轟聒耳巖上題名列諸王  
公主上柱國議郎等官側有天寶辛卯六月日餘漫漶不  
可盡識資州知州事趙遵來遊作詩云元牝谷神長不死  
腔血亂濺嗚咽水楓葉染霜秋巔丹杜鵑叫月暮山紫萋  
公一去二千年鴻飛泥印猶留傳只今寂寞資江岸夜深  
髣髴聞誦絃憶昔空山甘守約典墳淹洽又邱索徧演吉  
凶太皞易允諧搏拊后夔樂一朝筮仕入東周臣乘君兮  
滿目愁舉手徑排嵩高折橫軀誓抑黃河流那知國事日

凌替閭闔九關豺虎閉滬膽披肝祇自知陷胸折脰成何  
濟可憐十載窮陳編可憐軀捐祚不延可憐封樹委東洛  
可憐碧珠遍西川人民城郭俱非故蕪沒遼東棲鶴處飛  
瀑空泣滄海珠寒湫尙湧浙江怒吁嗟乎八百餘年歷數  
終孤臣遺憾終無窮行人指點荒山路一迴一度哭北風  
淋漓悲壯可誦也

吟觴鳴詩牧菴之弟也牧菴以縣令分發來川吟觴從遊  
天真流露藹然可親年甚少而詩甚工清麗芊眠有六朝  
人氣味作詩患無才又患無情吟觴詩生香活色才情兼  
擅異日所造殆未可量其豪邁者英雄氣芬芳者兒女情

也古劍歌君不見牛渚之水不可測一窪深黑神龍穴然  
犀欲照照不得飛上茨山化爲鐵紅光紫焰騰復滅歐冶  
風胡技巧絕鑄成寶劍經百折金環錯落色如雪寒芒閃  
灼雷電掣鬼母夜哭蛇首決豪傑得之逞英傑誓將生滅  
讐人血太平無事烟塵潔年去年來精采竭星文色黯鋒  
銛缺蓮鏐苔侵土花綴掌上摩挲纔一瞥何言捐棄埋邱  
垤欲待成龍一發泄夜夜炎烟天地徹壯夫有志須提挈  
不掉豎儒三寸舌送吳曉山漫對離筵倒玉樽一腔愁緒  
向誰論詩拈紅豆添新感酒灑青衫濕舊痕秋雨秋風空  
惹恨相逢相別總銷魂他年畱取輕帆在好載名花泛越

門入蜀有感回思往事首重搔一片幽懷付彩毫病骨已  
同梅影瘦香情猶似繭絲縈自從入蜀詩纔好每到憐春  
興也豪莫爲此行便惆悵有人還欲夢三刀春詞綠慘紅  
愁百慮牽詞人難度奈何天夢中蝴蝶空成色鏡裡曇花  
幻卽仙今世已留今世恨再生還是再生緣不如化作鵲  
鵲鳥飛上瓊枝共比肩依依楊柳曉烟含對對鴛鴦泛碧  
潭沁骨香薰春上已畫眉圖妙月初三伯輿東閣書殘恨  
碧玉南樓睡正酣懊惱歌成難入夢拈開紅豆種宜男佳  
句春影云纖腰瘦到鏡前柳醉靨紅添鏡裏花春情云草  
色乍添遊子憾筆花重和美人詩吟舫盛京廂黃旗漢軍

姓王

王牆東汝驥在蜀任新津六年歸著有炳燭集陶雲汀謂其詩抒寫性情甄陶物象與古之作者不相上下其憶昨篇有云敲扑不忍鞭常懸有訴不須符牒煩慈祥有循吏風兵火後學宮荒廢先生倡捐修復嚴虞惇作記謂其均徭役清田畝滅火耗恤市場皆有惠政文人何嘗不嫻吏事哉觀其銘衙石和尚壽塔卽五古一首耳從龍天社山突兀寶華寺啓自鴻濛時構或齊梁世土石初荒穢棟宇亦棄置飛塵厯歲年劫火非一二臨濟好兒孫跣趺藉茲地樹間掛半瓢草上安隻屨給孤來長者率眾勤布施像

設方莊嚴堂寮各整治甲子一週前黑山焰始熾師承摩  
頂語已識孽數至大地波旬風滿空修羅勢師走入蒼崖  
懸流故深蔽師偃卧竅穴積石若久閉猛獸當道蹲師來  
輒屏氣疾疫遍處行師爲作懺悔萬劫一定頃間浮將一  
歲師壽本無量淨土卽此是塊然者何爲亘古斯仰企  
嵩山少林寺和尚擅拳勇傳爲達摩所遺明時剿倭寇多  
資其力裁眉今多僧前多道人亦有擅絕技者唐荆川贈  
道人拳歌形容盡致鍊而勁曲以達人知其文之名世不知  
其詩之絕人也浮屠善幻多技能少林拳法世稀有道人  
更自出新奇乃是深山白猿授是日茅堂秋氣高霜薄風

微靜枯柳忽然豎髮一頓足巖石迸裂驚沙走去來星女  
擲靈梭天矯天魔飛翠袖甜酸含沙鬼戲人髮鬚磨牙質  
捕獸形人自詫我無形或將跟絰示之別險中呈巧眾盡  
驚拙裏藏機人莫究漢京尋橦未趨捷海外眩人空抖擻  
翻身直指日車停縮首斜鑽鍼眼瀏百折連腰盡無骨一  
撒通身皆是手猶言技癢是賈勇低蹲更作獅子吼興闌  
顧影却自惜肯使天機俱洩漏餘奇未盡已收場鼻息無  
聲神氣守道人變化固不測跳土蒲團如木偶

楊未禪署睂州遊蟆頤山山有張仙祠蘇明允禱于於仙  
生東坡子由因廟食于此未禪刺史時尙無子默念仙何

不送子於吾夜夢老僧入室曰公憂無子吾爲公子可乎  
遂生雲卿名翰幼穎悟十二三歲作詩下筆輒警刺史囑  
中江李夢蓮曰爲我裁成雲卿甫弱冠其詩豪暴恣睢如  
生駒不受勒控而高簡之作又淡泊蕭寥神與古會才固  
無所不可也及入詞林後自悔少作而少作殊未易及咄  
哉行云咄哉一紙當書空山妻磨墨聲隆隆輪囷大字走  
光怪兩脇浩蕩生天風手折芙蓉上下舞此身豈在樊籠  
中西齋昨夜夢陶謝相與大笑談鴻濛日光如輪出東海  
驚起溟渤生蛟龍醒來抖擻撐睡眼槎枒芒角填心胸以  
頭濡墨倒冠珮使筆如劍蟠英鋒三唐兩晉大前輩擲筆



狂叫將毋同眼前翻倒青玉案扶桑花照三山紅妻孥掩  
耳先笑倒霹靂雖震吾其聾吁嗟霹靂雖震吾其聾萬人  
如海同夢夢述志云扶桑日出銀濤湧駭浪雷奔浩呼洶  
巨鼇驚起海上來長鬣觸山山欲動男兒出世儘粗豪破  
浪乘風意氣高食盡青編三萬字書生事業等鴻毛金高  
南山印如斗七貴三公遇亦偶寶刀駿馬出蓬蒿叱咤風  
霆鬼神走側身天地不勝愁英雄豈子盡東流漢武秦皇  
豈不偉只今零落填山邱人生惟有少年好將相終須致  
身早氣酣日落亂書空白虹挂上秋天杳同弓生岑郊行  
宿草堂寺云秋聲淒已清落葉在庭戶間居意不適行行

出門去高嶺下牛羊落日澹禾黍地僻茅亭幽疎花掩深  
塢裴徊寂無人苔色上殘礎竹露昨宵深風來散成雨坐  
久澹忘歸泠泠鐘數杵偶聞木犀香禪心澹無語遣興云  
驅車古冀都日暮平陽路荒荒陶唐陵寂寂臯陶墓古原  
生悲風狐狸自來去不見唐虞人聖賢空死處我來思蒼  
茫弔古椒漿醺嗟哉三季後此意誰能悟行行從此去山  
川奔廻互怪禽不知名啼上白楊樹水亭小飲卽目云煙  
雨飽空林綠竹自寒瘦一枝斜入廊空翠濕衣袖晚風蘆  
葉動細雨豆苗肥水閣人無語蜻蛚空自飛惟憑一罇酒  
澆盡百年愁落日荒原暮蟬鳴樹樹秋涼雨濕芳塋禾黍

生秋意溪聲終古流竟日無人至野竹浸寒水空亭宿古  
雲秋來原上路蟲語弔荒墳醺雞舞不止野馬去難留飯  
罷捫腹吟已矣吾何求秋日卽事云落葉不知數蕭蕭滿  
石床寒花補秋色疎竹漏斜陽人與琴心古詩隨茶味長  
閒來林下坐雲氣冷衣裳苔篆斑斑碧蟲書蚊蚊長一花  
秋後澹畧卉雨餘香松吹迴涼夢桐陰冷夕陽深心何處  
託還待淨琴張

夷人善築礪樓以大小碎石砌成整齊渾如刀削中土工  
匠所不及四方中空高百尺兩三層人棲其上曹三選咏  
之云蠻中無地乃有山下臨壑谷高房顏每當隘口必置

守碉樓百尺居中間削成四方方以丈漆城蕩蕩不可攀  
中如佛塔畧設級盤旋下上往復還數人狙伺伏其上睥  
睨肆瞰攻者環如礮一發敵無隱以主待客安且間古來  
設險寧有此何爲今日叢榛芻信哉在德不在險穴中蠢  
動噬兇頑斷垣殘磔示深戒時見烽火中宵殷長城萬里  
力何鉅一朝內訌亡秦關區區繭室苦自縛公輸墨翟安  
能班行人駐足再三歎守爾樂國安羣蠻

成都傅泰熅人極溫雅現捐訓導好爲詩何虎臣解館贈  
別云願公痛飲無須辭且盡樽前酒一卮乍別又增中歲  
感相逢還問再來期長江鷁舸催行客遠道魚書倩寄誰

欲問曉風與殘月今宵何處酒醒時  
輓康民生云意氣縱橫敵萬夫  
誰教遺恨到黃壚十年感慨曾投筆  
半世辛勤恨守株豪放奇情誰似汝  
文章憎命子知吾陳蕃舊榻分明在  
無復高陽舊酒徒徐春帆挈眷來館  
頃舉一女作詩調之云怪爾雌風作  
意吹涼情透入絳紗帷飛花慣綴如  
椽筆賀客重賡弄瓦詩故事他年傳  
射雀祥徵轉盼夢占羅只愁禽向游  
山願婚嫁畢來是幾時登山云天風  
吹上最高身教作人間絕頂人氣觸  
星河通帝座唾爲珠玉落凡塵便宜  
乘興隨仙去何必攜書歎運迤堪笑  
當前存癡想仍同猿鶴結爲鄰

安縣二奇士一劉岐一趙緯劉岐字文山讀書一誦弗忘  
年十六食餼性篤孝祖母以賊亂被刃傷遂戒殺岐終身  
不敢違妻亡有子不再娶品行最端善爲古文邑令陳汝  
亨見而心折屢訪不見及去任過其門乃出迓令贈以詩  
題壁間家風畱清操環堵河之干靄靄竹林下苔荒侵曲  
欄叩門見孤標心潔貌亦端君古狷者流骨節何珊珊七  
載始獲面足遂平生歡話深日已夕秋老菊未殘趙緯諸  
生事繼母以孝聞有蕭姓遺金子途緯拾而還之是時家  
貧方負米以歸也父柩在室鄰家草房延燒甫及門而滅  
塋父廬墓有白鳥一雙飛翔馴伏人以爲誠孝所感縣令

秦武域贈以詩云巴西有一士是乃真孝廉高義能安貧  
鋤金心自恬永慕廬親墓白鳥翔屋簷百行大惟孝品節  
由此占我來牧斯土移俗空懷慚贈言用旌善還以厲其  
凡

心聾居士作順慶竹枝詞百首意在通俗如京師竹枝之  
類錄其近雅者以記風土施家堰在妾家西堰上垂楊隔  
戶低妾偶觸愁人不解予規飛上樹梢啼楊柳井邊楊柳  
春楊枝低護隔牆人郎來莫折楊枝去儂與楊枝作比鄰  
半邊街上曉風輕雲髻新梳映日明聽說賣花人正過拏  
簾低喚兩三聲蓮船新樣挽烏雲翠勒高圍燕尾分粧飾

近來風氣變多穿衫子少穿裘絲帕纏頭髮插釵調脂弄  
粉善安排倚門笑買蘭花戴撲鼻香添丁字街鄉村兒女  
各當家半是耕田半績麻閒與鄰人數家產一年一季好  
紅花挑邊頭上小盤鴉短髻低垂兩面遮莫笑阿儂妝樣  
醜要人知是女兒家金泉山上踏青回行到西溪眼界開  
一路香風吹不斷簪花婦女過橋來紛紛爭說看龍舟都  
向城南岸上遊路仄郎忙妾停步怪郎行去又回頭納涼  
攜酒至西河扇影衣香隊隊過甘露寺前萬竿竹遊人來  
往喜風多

紅脰雀以領毛色赤而名亦名黃脰雀音相近也性喜鬥



門酣雖旁有人不解童子乘門取之如拾芥入手卽斃棄  
之旋飛去知其詐也籠而蓄之因其善鬥少年喜事者遂  
攜以賭采如養鸛鵒雕籠精巧嵌以玻璃幕以文錦人蔘  
肉桂煎汁和丸以飼其珍貴如是成都鬻之有市自昔蠶  
市外又開一局而面矣雙雙爭鬥墜高枝一似溪邊鶻蚌持  
就裏誰知藏誦計証人佯死豈真癡身入牢籠不自憐依  
然賈勇屢爭先門酣皆裂旁觀笑盡被兒曹賭取錢紀之  
博一粲也

按黃脰雀古名鷓鴣  
又名巧婦姑從俗呼

盧承恩號瓠園奉天人康熙中以貢生宰昭化多善政長  
于詩葭萌漫興云春風亦肯到殊方嫩綠新紅散野香座

列圖書貧豈病民能耕讀少何妨沿山樹色來窗外徹夜  
江聲落枕旁不必屢愁烽火後好刪荆刺築泥牆晝卧多  
時自不羈開簾放目縱遐思幻憐雲白難持贈秀愛山青  
可療飢半畝花繁侵案牘一爐烟細散牆籬政閒獨幸奔  
馳少明月清風兩得知祇餘水秀映山青瓦礫堆中認縣  
城望去總非塵市色聽來都是鳥禽聲青禾岸下新開隴  
白石江頭舊札營撫字愧難收速效粗知禮讓漸無爭江  
水滔滔去未休憑誰一柱砥中流膏腴未就肥民計花柳  
難消瘦貌憂數月近聞豬可豢三更不見虎來游欣傳故  
國笙歌滿何敢疎狂憶酒樓蓋兵火以來景物荒涼而招

流亡墾田土建衙署修祠宇暇則種花木見諸吟咏可謂  
循吏亦足稱風流宰官矣

文翁石室悉圖古今賢聖禮殿記歐陽公謂蔡邕書石柱  
上有鍾會隸書周公禮殿圖考謂西晉張收畫共一百五  
十五人宋紹興間席益摹于石經堂又增十三人齊永明  
中刺史劉悛畫禮器宋李石有府學十咏成都生秦賓谷  
曰寅步其韻署藩憲劉燕庭先生深賞之畧錄三首殿柱  
云五字擢英才課最皆其殿而翁實善書家法守不變入  
蜀侈掩襲乃亦思裸獻偶逞波磔奇有類欃槍見險勁過  
曹瞞狡捷寄振轉豈特矯元常早并吞劉禪裒擅越陰平

天若假之便隙末否終凶詭計毒於箭艾艾赴檻車利已  
謀何善攘美復售欺甘附姦雄傳一淵不兩蛟此語何須  
辨卽論文筆挺亦數典午彥柱平恣揮灑爲汝畱一面儻  
教垂至今價值諒匪賤遺蹟終磨泐流光急飛電禮殿晉  
人畫云古來重壁畫蠟粉堅塗牆胡爲疥吾壁憨僧說李  
唐上溯顧陸下吳李神妙一一稱當行晉人粉本實鼻祖  
解衣磅礴隨鋪張蜀都禮殿誰氏畫直將白垩作縑緗各  
有道統任俱非時世妝云是益州刺史張收筆當其構思  
懷古心茫茫百五十五人草衣卉服及冠裳或爲聖爲賢  
或爲皇爲王或爲大儒揚玉藻或爲將相垂金章風神奕

奕具生態上與文昌并絡同英光簪裾慶雲聚劍佩靈風  
鏘閱世千萬年眞容萃一堂嘉祐摹本已不見况乎太康  
之邈何敢望神仙鬼怪圖寺壁荒誕未可相頡頏綿綿一  
綫欲絕還復續誰爲添著周程朱陸張邵慰彼蒼齊人畫  
禮器云聖賢先有像精采照都城城南文昌氣夜夜珠聯  
星儻非筆端巧世徒震其名有人須有物器服辨分明槃  
羹旨圭瓚對之眼爲青業虞桃祝敵自昔羅諸庭冕袞裳  
黻舄意造何由成阿誰歛識具法物擷其英劉懷刺郡曰  
懷古發幽情濡毫寄思遠逐一摹其形繪人未繪器補此  
畱典型拜瞻不忍去端足翊隆平

人皆知張桓侯之勇疑其粗猛而刁斗有銘文人心折不  
第此也碑目載巴江岸有侯書紀功碑云漢將軍張飛率  
精騎萬人大破賊首張郃于八蒙勒馬立銘凡二十三字  
張槎仙曾見搨本奇古蒼適眞法物也作詩云穹碑矗矗  
字如斗蛟蟠龍躍老螭走勒馬立銘者誰氏車騎將軍漢  
巨手憶昔蜀魏河山爭北軍勢盛吞如鯨二郡已下民將  
從時危何處求干城巴西太守人中虎熱血滿腔甘禦侮  
賊眾我寡氣愈豪誓滅仇讎報故主岩渠蕩石兼蒙頭山  
高路險猿猱愁萬人之敵勇且智別從閒道驅貔貅賊營  
已近鼓聲裂元戎一騎趨虎穴西川男兒好身手斫陣突

圍勢何烈刀光如雪飛花輕彌空虹彩槍縱橫人頭亂落  
血滿嶺一時三砮軍全傾從此烽煙蜀無警萬家耕鑿樂  
閭井事關君國非細微大書深刻並鐘鼎我昔涪陵千里  
行刁斗曾讀賢侯銘文武兼才古已罕茲逢此碣尤崢嶸  
漢季迄今歲屢易風雨無傷事實異幾回靜對思雄風使  
筆猶存用矛勢

秦李冰醺內外江爲五石犀以鎮水怪江南徙地爲陸後  
人擴城基石犀遂入城內其一乃在將軍署人不知其詳  
乃於城外構石牛寺並琢牛以實之成都張洸詩云一犀  
石橋二野浦兩犀陸卧叢林藏題爲龍淵寺觀秦李太守

石犀石犀左右名龍淵寺云龍淵不云石牛應在城內非  
城外又云惟憐李寺失其一不知在將軍署者乃真也豈  
兩寺皆有石牛乎又灌口後人鑄鐵牛以禦水吾東馮舍  
人廷樾鐵犀行有云垂龍貪勢不肯降鱗鬣出火光射地  
老牛鬥酣兩角折兀然不動化爲鐵風剝雨蝕三千年垂  
胡猶帶戰時血卽今江水白於銀潮平岸穩沙無痕漁舸  
一葉飛夏口龍驤千斛奔荆門所咏鐵牛在沔江未指明  
何處似非灌口所有

蠻中最重銅鼓一面易百牛云武侯征蠻所鑄京師有得  
諸葛銅鼓者吾鄉馮大木趙秋谷作長歌名動一時其詩



不爲選家所錄蓋爭奇鬥巧非作家真本領未見其詩不  
詳其制來蜀親見于武侯祠未敢作詩楊蓉裳有詩張沆  
和用原韻起云參天柏映玻璃深堂何物光迷離直四尺  
餘濶尺五上寬中束臍環垂面排水獸鏤紋細年久色含  
鸚鵡姿摩挲再四發遐想軒耶摯耶成於誰卽此可見鼓  
形髣髴要未曲盡其制按祠中銅鼓有二一巨一小皆上  
面大下面小蜀中原無此鼓溫江葛荃官雲南得二鼓以  
歸其幼子爲縣丞者藏于家家落售于成都城內鼓樓街  
古董舖人莫之顧有臬司見而買之卸任時送諸武侯祠  
人多不諳擊法葛荃長子亦官雲南建水州其子紫順山

深明擊鼓法云居高處繩繫二鐵丸墜而擊之起落有節聲音洪亮而遠聞蓋傳于蠻人明時破九絲蠻得銅鼓最多必有畱于蜀者兵火後失之耳竊擬其制而爲之說曰蠻地烟瘴多霧多雨皮濕則不鳴故以銅銅有土行燥濕不變也鼓必有架鼓腰之環懸于兩柱中間不著地則聲洪架之上必有橫梁梁必有二環繩懸鐵丸以繩穿環過握之抽則丸起放則丸落緩急隨人銅鐵相撞則音清軍行無常處用人扛架可行可止不必人居高樓以繩垂丸如是之迂滯也惜無人試之

謝小蟾家本巨族初以處女效文君之奔繼以側室抱小

青之怨薄倖郎不復顧惜大婦乘隙逐出自作駢體文一首詞極華豔情更哀惻繫以七絕四首來續前生未了因可憐辜負好青春願將紅豆芟除盡不把相思誤後人淚滴長江逐浪流天涯流去不回頭多情只有菱花鏡相對分儂一半愁孤雁哀鳴過玉樓琵琶聲斷四絃秋佳人自古如名士一樣飄零不出頭愁眉懶畫月初三欲訴哀情轉自慙畱得千秋鴻爪在夜臺味苦也回甘和韻云飛蓬無復上妝樓冷落西風滿目秋憶昔與郎調笑處碧紗窗下看梳頭靜對寒釭夜漏三新詞欲和轉懷慙琵琶彈罷青衫濕得遇知音意也甘朱少尉光昭見而哀之爲賦詩

云朱子年來頽老矣少時風情今全已形同槁木心死灰  
不教綺語來筆底忽然佳話取口喧人稱瑤臺第一仙聞  
罷不禁狂態作阿儂那得不詩傳謝家有女能咏絮嬌姿  
應教花枝妒記取明蟾作芳名長成養在深閨住爺娘鍾  
愛異姊妹寶髻雲鬟圍珠翠娉婷二八正妙年問名未肯  
輕許字花間驀地遇阮郎恍如銀河渡渺茫文君能解琴  
心曲司馬慣操鳳求凰兩情脈脈靈犀動鴛鴦逐對字一  
行媒妁不仗題紅葉定情何須黃金合郎才妾貌相愛憐  
安排金屋深藏納朝朝綵毫畫春山夜夜繡幄燒絳蠟誓  
將生生作夫妻私語無人笑相答天上聯隔傲女牛人間

佳偶羨綢繆花放並蒂春長在盧家從此字莫愁誰料牆  
外漏春光難覓鶺鴒癡妒方蕉葉有心奈雨打楊枝無力  
任風狂猜語狎聲日詬誶揉盡落花滿地碎生成弱骨瘦  
難支暗倚欄干濕紅淚藕絲難斷恃郎心不甘緣珠樓頭  
墜妾惜薄命誤前因郎笑無情變初志祇重浮名輕離別  
上書竟往長安地不布寶陣護名花一任摧殘難逃避那  
堪麗質逐遠行南北東西嗟飄零拚將心情付流水憐他  
身世等浮萍天涯走遍無人惜落落風塵原難識吟成一  
字一珠璣怨寫胡笳十八拍每將往事憶胸中枝頭啼破  
杜鵑血不願來世挽鹿車但誓再生化頑石此心茫茫永

無情免令再受相思厄細寫蠅頭紙萬張阿誰讀罷不感  
傷雖無關心勤物色博得傍人空斷腸從來色貌與才藝  
兩美都爲造物忌佳人每嗟白頭吟才子也歎窮途滯豐  
此嗇彼理固然何必傷心干甚事我本情癡癡似卿相憐  
惟有影共形世間倘有同心者定倩彩筆傳小青

奉節傳濟菴之鄰賣花張叟言城東某姓女名阿憐者年  
二十貌極妍風致極澹雅居平焚香讀書好題咏不令外  
人見標梅愆期鬱鬱成疾有吉士求之復爲諸昆所悞乃  
泣數日不食死濟菴哀之爲賦呵蓮吟咄咄悲從何處來  
人間天上兩徘徊斷腸盡是如花女落魄偏多繡虎才偶

向鄰園舒積愜賣花老叟留髡醉酒酣耳熱恣雄談停杯  
爲說酸心事城東有女最妖嬈一念春風荳蔻梢顧影自  
憐羞語燕倚欄無力怯生綃銷魂最是芙蓉面門前靜掩  
班姬扇結綺樓中不敢窺避風臺上曾相見東施豪富西  
施貧荏苒韶華二十春茅屋牽蘿戀夜雨梨花深院鎖芳  
塵紅絲聽說崔盧裔合粉奩香生意氣誰料諸昆不我天  
蹉跎又失于歸計一病支床不忍聞傷心紫玉化烟焚兒  
家才貌無婚媾行路悠悠有淚零聽罷此言心惻惻天闔  
欲叩慚無力我亦風塵憔悴人對此茫茫百端集由來造  
物忌紅顏况復才名非偶然洱海飄零蘇學士夜郎流落

李青蓮男兒坎壈多如此無怪佳人今爾爾一曲趨詞弔  
阿奴天高室遠情無已

新津藍正色父名燦死張獻忠考試之難囑正色全身延  
祀涕泣請母袁氏妻徐氏同逃母妻不忍累投江死正色  
避居蘆山十五年亂平乃歸荆榛滿目村落無所棲得崩  
土坎林埂子之小土廟居焉一夕夢見白髯叟扶杖而揖  
曰君苦矣君室徐殉節之明日再生於本境之徐氏遣媒  
往可重聚醒以夢弗信越日復夢作色曰君不信吾言明  
日河溝水磴舂米青衣紅領者非君妻耶如言往果不爽  
請鄰作伐鄰曰此女年十八無問者語無不諧父果允娶



後生子緒昌孫成璧任湖北茅山鎮巡檢曾孫枝美任直隸良鄉縣丞

順治初重慶王某娶婦歸至半途流賊突至眾逃散婦亦奔避慮受污自刎其鼻入滇爲人負薪水餬口越四十餘年康熙中老不能服役將自沉哭於江岸有商舟暫泊聞哭聲甚哀細詢居址姓氏則哭者乃其妻而氏亦細詢夫之居址姓字兩無訛也是時夫亦未娶且驚且喜且泣眾亦感泣謂有鬼神卜吉成禮而夫婦年皆逾六十矣偕歸渝北小龍坎築室名復圓寺焚修其中稱大居士二居士王西躔夢庚爲作詩云王郎娶婦正在途倏值流賊交衝

突驚散良緣各竄迹比翼鸛鵲互相失淑女弱質恐受汚  
引刀剗鼻毀容飾相憐輾轉入滇南就傭負戴資食力半  
生心迹未分明未見我儀與我特回頭不覺四十年辛苦  
艱難徒飲泣拚將薄命赴清流如此白水全芳節厥夫怡  
附估舶來聞聲一一詳顛末彼此相看兩白頭義夫貞女  
真佳匹鄰舟感歎助催妝歸到渝州偕卜吉同是年逾花  
甲人矢志焚修抱芳潔渝州州北小龍坎眾築團蕉安食  
息相傳世隸南城坪二大居士稱嘖嘖毀容釐面古曾聞  
割鼻貞姑重方冊

張貞女岳池大義女生而聰敏及笄已定姻矣嬰奇疾辭

退壻家越三年疾愈父母將別字之對曰一女不許二夫  
義也願長依膝下効勤劬撫稚弟弱妹十指足自給不累  
親也父母終不忍使人婉勸則涕泣以死自矢姑從其志  
則恬然操作戚黨罕見其面終父喪扶孤弟養孀母嘉慶  
元年無疾而終年六十四矣人咸義之多作詩咏之武進  
惲蘭坡經尙云非關破鏡感時乖別具清操冰雪懷連理  
無枝羞再結女貞有木歎同儕裙邊不繡鴛鴦鳥枕畔常  
拋鸞鳳釵四壁蟲聲秋已暮淒涼夜月照閒階孫亦淇文  
起云鏡花水月悟前因太璞終完守此身甘旨承歡憐弟  
幼勤劬佐續念家貧女稱全孝風彌古邑有奇貞里必仁

爲語岳門賢父老式問我欲問芳鄰

明旨和尚家素富幼穎悟好學爲文出語驚人師愛之許  
字以女一夕夢神語曰汝是佛弟子無塵緣醒告父母俄  
得疾見種種怪相可怖矢曰苟病已將捨身沙門病遂愈  
未幾復病身與死鄰父母不得已披剃爲僧一切經典目  
遇心通來新津平岡治建道場前許婚之女聞其出家誓  
不適人孝養父母誦習經卷年已老聞和尚所在涉水登  
山相訪各道功果遂悟前因遠近驚異和尚善畫山水松  
竹各臻妙境又善畫貓得其一紙鼠不入室雍正間人  
劉菊航宿觀音橋見題壁詩似悼亡姬錄以示人詩云無

情風雨偏重陽籬菊飄零慘不香莫怪看花人掩淚古來  
多恨是江郎楊柳輕盈自寫春幾疑飛燕是前身無人解  
得畱仙術裙帶隨風欲化塵冰樣聰明雪樣姿生來原不  
解噴癡任他梁燕喃喃語鸚鵡棲籠總未知學拈彤管書  
秋蛇酒譜茶經試不差此後愁看遺墨在簪花極好是空  
花飲罷屠蘇病已深傷春送別更驚心可憐一掬牽衣淚  
直爲征人滴到今半年明鏡不開奩瘦骨支離影更纖剩  
有當時花樣好蓮鈎端整約雙纖算來惟我負卿卿十九  
年華了一生經過生離旋死別黃泉那得不吞聲曾記長  
安並馬來曉風殘月幾徘徊如今失却清娛伴縱遇名山

眼不開拈來詩讖迥添愁  
好境都疑夢裏遊  
寂寂空堂風露冷  
傷心不是爲悲秋  
一杯黃土葬嬋娟  
謾謾松風散紙錢  
地下香魂相憶否  
勞人又賦北征篇  
有知之者云是大竹江曉帆太史國霖作也

女楊氏新繁人行乞成都市  
足顛色槁自言去年大水田廬沒  
母攜之外家落田折足母亡父負以走棄  
置于此時道光庚子四月也  
張懋襄爲賦薄命女云  
女兒命薄不如花  
花落猶在東鄰家  
女兒命薄不如草  
草死還共根荄老  
花花草草兩不如  
蒼天蒼天予何辜  
阿爺無男獨生女  
塗窮日暮依誰子  
阿母養女如養男  
口不能言神慘然  
去年

滔滔降大水田廬屋宇皆泥滓阿爺亡命走天涯阿母攜  
兒歸家裏數窮運極不可逃一蹶中田顛厥趾欲行欲行  
還千寸痛入心脾不敢哭阿母撫兒心肝摧阿爺歸來雙  
淚垂家中已無隔夜粟世上難尋折肱醫酸風颯颯連天  
起女兒命薄薄如紙慈閣寒生未幾時痛兒已入黃泉裏  
天寒月冷暗傷悲虛室無人魂早飛獨自夜闌長泣血明  
朝父女相啼飢米爲珠薪爲桂竈冷無烟塵甑敝侵晨來  
入成都市負兒賣向朱門第兒身貧兒骨瘦賣兒不如鷄  
與狗阿爺棄兒投荒走腸斷有言難出口從今父母各分  
飛死別生離一回首淒淒切切淚闌干呼天無聲聲辛酸

愁雲不散血凝碧旁人聞者心膽寒  
天乎人乎遭此毒言  
言嗚咽身摧殘

蔣礪堂先生攸銛在蜀作監臨闡中詩題工部草堂後與  
學使聶蓉峯遊草堂卽相與賦此題爭巧鬥捷在都瞿頤  
以詩文進質卽題扇作七律二首送其謁選後二人皆官  
于蜀亦佳話也詩云天設名場因此人文章磊落性情真  
游經關塞詩兼史曲譜忠微妙入神

著有鶴歸來傳奇

一片宮商

含鐵石半生琴酒雜風塵詞壇人擅扶輪手富貴何須早  
致身銅章忽現宰官身老驥知途定絕塵繡隴雉來春有  
脚訟庭花落聽如神飽讀草澤烟霞癖畱得詩書面目真



自古親民先善俗絃歌不乏采風人礪堂先生道光乙酉  
入贊綸扉於故麓中檢得浮籤一紙乾隆戊戌初應童試  
物也是時年十二歲卽于是歲入泮已五十年矣及典會  
試重入貢院見坐號宛然爲餘字三號因囑順天府教官  
將滿洲蒙古漢軍取進原案各生註明籍貫裝爲一冊而  
揭此浮籤于前一時歌咏成帙其不忘舊如是知先生之  
深于情矣

中江寧國寺有音樂壁以指拍之則應聲如奏管絃邑令  
不信躬往試之誠如所傳乃作記以爲佛法顯應又一令  
疑其中必有怪物破壁以驗藏匠人一墨籤而已自是不

復有聲夫神其說於佛固愚而必欲窮究至於毀壁亦兒童之見也夫

錢塘吳宜甫振械隨父官蜀後爲山東登萊觀察著有華宜館甲乙稿題陸日爲鳴棧道圖云南棧北棧千峰峭風雨騎驢日吟嘯二十年前汗漫游今朝失喜身重到細看八尺懸生絹作者遂山之老樵老樵名重康熙朝奮筆能使山動搖山中平地無尺寸萬間棧閣青苔蕤利州龍門最斗絕嘉陵遠瞰風江濤半空縹緲度人馬綫路百折緣秋毫蠻雷黑箐恠鳥舞清霜赤阪驚猿號客行到此毛髮立劍外日落西風高孤雲兩角幾千丈千梁無柱安可往

由來益州重天府設險分明羅指掌君不見乾嘉之際多  
鈔盜窮山驚見犛牛羶十年殺氣纏草木千里人烟虛井  
竈赫然 聖怒責驅除電掃厓垠白日照披圖休唱蜀絃  
哀編素漠漠青天開五丁未鑿崎嶇路終古惟思撫御才  
送登州總鎮周將軍

志

還蜀養親海童晝游波浩浩珊瑚

市上日出早佩劍同謁萊君祠樓船頻過田橫島朝來東  
海邊飲馬水清澈暮來東海邊磨刀水嗚咽平生百戰今  
老矣入水斬蛟心未死白雲親舍萬里遙愁逐潮聲朝暮  
起酌君別酒重徘徊水流到海何時回花驄玉勒褒斜去  
少年提刀殺賊處到家上壽芙蓉秋芙蓉城下粉江流舉

杯見月應相憶月正來從東海頭

蜀俗尙鬼有病輒請巫祈禳謂之端公金鼓喧囂並扮女  
妝及花面鬼卒旋舞於庭親鄰聚觀如堵以錢來贈者畱  
飲並令女妝者行酒爲樂巫風盛行禁之不聽習俗然也  
孫野雲作東鄰巫云東鄰入夜誼巫祝月黑風淒鬼母哭  
燭影紅搖四壁高團團紙錢飛上屋大巫如嚙作神語童  
巫弓鞋態客與假髻雲鬟予目成天斜宛是淩波女窄袖  
綃衣笑當席兕觥潑潑眉淺碧嬌花一樹鄒櫻桃諸郎樂  
與觴今夕故鬼大而新鬼小如此歡場鬼亦好暗中難免  
鬼挪揄鬼伯鬼師兩絕倒病者在室巫在堂癡兒弱女紛

翔翔簫筦備舉聲喤喤磨刀霍霍剗豚羊東鄰作巫西鄰  
效巫巫載呶載號叫惜哉昔無西門豹

從姪永濟今歲來榮往嘉定偶買青菓歸有詩云共知眞  
味不宜人眞味如何不可親酸苦漸回甘沁齒未曾嘗著  
却含顰買婢作詩云小小何能諳世情況當孤立倍心驚  
一聲呵叱于聲淚不是愁生卽病生人生榮悴亦何常春  
日看花秋後霜冷落寒枝能結果逢時自不受淒涼語淺  
意眞仁人之言

溫江劉春開國初雲騎尉致仕居石家廟旁廟傾圯倡修  
功竣入寺聞林中有虎時突出食人開聞怒奮臂逐虎虎

逸開云俟詰朝圖之旋家和衣卧妻妾挑鎧坐夜三漏聞  
風嘯聲疾起見血濺地妻妾已被虎銜去蓋二虎也開執  
戈挾矢追入林際月光下見虎方嗽其妻妾急與鬥殺斃  
一虎其一帶箭而逃潛伏大阜開尾追不及防虎躍起攫  
之斃鄰人具衣冠葬之越一日中箭虎倚開墳死勇過十  
莊歿猶有餘威奇矣蜀地建昌近邊塞多虎雅安令粟芸  
畦穗募人以毒弩射死五虎南江忽有虎艾某習某往殺  
之楊世燾爲作打虎行其父冠山和之形容曲盡其勢如  
目觀詩云山風獵獵山樹鳴山路崎嶇斷人行踞牙鉤爪  
斑斕虎撲地一吼人皆驚聚眾追隨遠相逐虎行緩緩故

不速直上前岡始負嵎吞身縮爪睥其目到此相看不敢  
前虛呼空喝祇徒然勇哉艾生無客氣習生亦豪爲之貳  
我不死虎虎死我有進無退何多計持矛直至石崖間旁  
人遠呼盡胆寒一躍突出天色變矛刺虎心人臂斷習生  
後勁挑一矛齊墮高岡人虎亂虎吼一聲兀不動艾生裹  
臂焉知痛抬將死虎幸生還將鬚履尾一市閱我鄉百年  
無此物偶有卽能除其惡嗟哉除惡豈易言志能斷臂方  
能搏

吳梅生先生纓浙江歸安人余來川時其姻楊喬橋明府  
屬致書于梅生相見未遑談詩後見古文詩稿皆可傳平

生攻舉業屢試不售乃就刑幕少耽吟咏隨手散失入蜀  
詩尤多畧自檢存過菁山訪芷鄉畱飲適陸杏樓過談招  
同梭舟南陽山觀劇復拉芷鄉梭舟遊常照寺卽事賦贈  
芷鄉兼柬梭舟杏樓平林數轉溪一曲盡日徘徊肆遐矚  
臨風忽憶我故人折柬頻煩牋半幅朝來乘興作山行輕  
舟相過慰幽獨數峯翠色恰當門點綴堦前有殘菊殷勤  
爲我具盤飧羅列山肴與野蔌百篇乍讀瑰異詞斗酒同  
澆塊磊腹士衡俊逸自超羣縱橫跌宕謝縛束論詩豪氣  
更無前賞音逸興還同續梨園度曲南山阿管絃聲急振  
林木聽罷新聲令我愁悲歌欲擊漸離筑年年折柳唱陽



關交游多半驅征軸浮沉一任滄海波飄泊遙憐大江麓  
詞場相和少塤饒文陣爭雄失頗牧故鄉雖樂豈寧居春  
風我亦還追逐已分名心劫後灰還疑幻夢蕉中鹿愁裏  
爲歡復幾時浮生况被羲輪促無慘更作招提游攜手相  
將探幽谷看山那問暝雲歸排悶并忘寒氣肅由來離合  
本循環共說悲歡若轉轂交情今舊無參差他年良會何  
當復杜陵草堂云世亂家何在乾坤一寓公感時還痛哭  
報國祇孤忠詩許春秋續才原稷契崇風流猶想像寂寞  
草堂空張桓侯墓云名將傳燕種英魂土一抔鬚眉猶百  
戰義烈自千秋風撼靈旗肅祠開闢苑幽至今資捍禦功

德頌桓侯重游釣魚城看牡丹云絕壁江三面穿雲路一條  
戰爭成往事花月又今朝古寺禪心靜芳園國色饒興  
來還剪燭樽酒倍魂銷蜀游有日偕內子過外家辭別賦  
呈外母兼贈內兄德嘉云一尊且自坐團樂不盡丁寧淚  
欲彈澗畧悔教歡會少情親更覺別離難香迴曲檻春風  
細雲暗孤峯塔影寒此去天涯增悵望殷勤誰與勸加餐  
西村以前和壽詩疊前韻柬寄並承獎許過當因仍疊前  
韻答之云好花空對菊花辰愧我東西南北人到處湖山  
添酒債長埋名姓苦吟身相如善病牽愁易宋玉多情惹  
恨新漫托蛩吟羞大雅敢將牛驥與同倫秋郊卽景步劍

星族姪原韻云漫說垂楊管送迎經秋無樹不關情涼蟬  
孤雁西風緊楓葉蘆花夕照明嶺寺煙凝迷鳥道江村晚  
渡亂砧聲勝遊卻憶蓮花幕謝眺詩傳氣骨清蓮村明府  
招同諸友重遊斗姥閣以詩相訂卽用其韻奉酬云又向  
元虛共叩關白雲深鎖半房山涼生四座風三面水遶雙  
城玉一環花若有情迎客笑鳥曾相識伴人閒此中自得  
林泉趣幾度攜尊共往還

我眉魏小峩廷達道光乙酉拔貢戊子順天鄉舉選鹽源  
縣廣文喜作詩梅花書屋卽事云客訝蜂聲滿院聞一樓  
烟雨淡斜曛天於竹屋清三面人比梅花瘦幾分酒債有

時將晝抵睡魔難遣用香薰逃禪遊客翻多事料理殘書  
讀典墳觀傀儡云連年傀儡感餘生木偶衣冠百態呈悟  
到此身皆幻境看來過眼是浮名歡場蹤跡隨時換孽海  
波濤幾處平婚宦消磨筋力盡不堪回首夢魂驚餞春云  
繁華結習已頻刪送汝東風返舊關陌上花開歸緩緩枝  
頭紅褪去閑閑名園酒醒春如夢故國歌殘鬢欲斑莫道  
韶光今正永恐將白髮易朱顏出都感懷云鳳殿初辭出  
玉京馬頭春色喜逢迎山邊積雪因風散客路梅花傍驛  
明舊夢已隨流水斷壯懷猶逐亂雲生他年再奏霓裳曲  
願與羣仙結會盟巢燕云故國移居夢已非休將門第傲

烏衣舊巢重到恩猶戀新侶同來願不違細壘香泥融畫  
閣倒啣花片入瓊扉呢喃似與彫梁約明月何時照我歸  
遣懷云難從幻海問前因昨夢如仙迹已陳半世浮名難  
肋味一枝斑管免毫春到頭穿札推強弩過眼空花笑轉  
輪畫意詩情清欲絕枉拋心力作詞人

廖東厓以知非子三冊見示云威遠秀才曾禮和著自號  
知非子有志聖賢之學者雖少獨得之解在今口已爲空  
谷足音自述賦性最拙少習詞章不能工一夜夢遊紫陽  
洞窈而深曲意甚樂之究不知紫陽何謂也及讀綱鑑乃  
知爲朱子自號道光乙酉鄉試遇新都劉文統相語以理

學辛卯至其家示近思錄等書心竊有感二十年喪妻遇  
饑饉家業蕩盡境遇困極而心忽有悟咏詩以示懷云自  
笑生財累昔年何曾貨殖倍從前而今識得清閒福晏起  
早眠認性天吾道原來在眼前功深自覺樂陶然者番難  
與童蒙說且自銜杯讀舊編二十二年云夢見卜子夏方  
頭大面身長八尺餘相與問答夢境固不可憑要其人固  
切實爲已讀書人本色其友彭源清壽以詩云平生淡泊  
樂天真不負韶光六十春若論詩文餘事耳忘憂忘勢且  
忘貧聖聖薪傳總復初如公率性自安舒斯文一派人多  
少心果知非是讀書知非子父號東山以醫術行里間不

較財疏食飲水晏如也年八十九乃卒七十時有詩云不  
覺年華七十春依然天性未沈淪雖無德業恢先祖猶有  
心田裕後人道光十五年夜深方睡見一人足帶泥塗上  
床同卧急呼家人起尋不見未幾病歿將葬子以其地非  
吉并遷母柩開視易棺則蟻銜泥堆足幾滿人將死則與  
死者爲鄰風水之說非無因也

趙實君秉淵上海人璞函先生子也璞函在木果木軍營  
往省蓋隨學使吳白華至蜀僅留十日卽回未幾難作實  
君以蔭官出牧睢州守重慶著有蜀道紀程詩汪學金題  
云海棠春盡雨如絲錦袖綿城捉管時萬里才名巴蜀檄

一生涕淚蓼莪詩白雲猶繞蠶叢樹碧血難歸馬草屍回  
首岷江腸斷處不勝哀怨杜鵑知吳蔚光題云風物山川  
目瞭然無多行卷早堪傳才華豔奪巴江錦音調淒迷蜀  
國絃萬里省親烽火外半年歸客瘴雲邊峽猿啼徹終天  
恨忍付成都十樣箋晚年自訂爲退密刪存稿雖不及璞  
函先生之矯健縱橫亦可謂不墜家風矣別家一首云晨  
雞鳴前除游子攬衣起征馬向風嘶僕夫戒行李上堂拜  
慈親別淚滴雙袂母言汝勿悲曉汝以大義汝父從軍行  
昔戊今在癸三年瘴海淹兩載蠻鄉滯書生事戎馬萬里  
輕轉徙我衰已宣髮彼老應豁齒汝往問眠餐勝以當歸



寄況有父執友撫視比猶子長途愼起居數致平安字更  
望早歸來免我門間倚母命良諄諄哽咽難置對車下在  
母旁上車兒行矣服除就廕入都述事抒悲三十韻兼勗  
二弟硯懷云草草營幽竊悽悽賦遠征哀宗慙長子孤露  
痛餘生卅載趨庭訓三秋枕曲情音容殊錯迕噩夢屢回  
縈蜀嶂千重峻蠻雲萬里平身常棲幕府心每戀承明險  
阻旌牛微精嚴細柳營霜林飛礮火雪嶺迸狐麋使相神  
威重參軍末議輕壯懷憑短劍奮志繫長纓磨盾才眞敏  
移營計孰爭賊氛侵壁壘殺氣暗機槍閱嘿看僮僕倉皇  
返旆旌元難歸晉軫血竟化萑宏匝地烽烟緊終天淚雨

傾別硯懷一首云貧賤別更苦欲語氣先結舟人報潮平  
解纜催何急慘褸立須臾月黑波浪濶憶昔童稚初推棹  
讓梨栗謂當永相依侍奉不離膝豈知積罪愆昊天痛降  
罰相看六尺身何處可生活譬彼鐙燭光形影詎差別一  
朝爲飢驅敝裘犯霜雪男兒誦詩書所貴明大節出門事  
功名焉能顧家室堂上有慈親暮景飽茶葉朝數甕米炊  
夕檢桁衣質兒貧累我母念此心暗怛子由似先君四海  
孰能及去去各勉旃負負勿復說

蜀方伯姚公令儀非特文筆擅長爲人實有骨力知成都  
時隨福嘉勇公征勦爲軍司馬福公素威重營中使輿夫

執戟環侍輿夫藉勢氣焰凌人出與張都司爭道毆傷其面都司訴於姚姚怒呼輿夫至詰之倔強不服姚叱曰都司四品官爾敢以勢力相欺是輕朝廷也痛杖之垂斃以稟大帥福公笑而領之當時僚屬凜凜匪獨不敢忤制府卽制府下人之下人亦莫敢誰何姚獨持大體胆氣過人袁子才謝某將軍啓云人謂枚先有不愛一官之意而後動於刑枚知公原有不屈一夫之心而敢行其志正此之謂福公能容亦不愧大臣器度

巴州武舉劉崑署都司簽事管烏蒙鎮左營遊擊事雍正八年烏蒙猓猓叛逆崑挺身決戰敗之次日賊大至眾寡

不敵被數十創遂醺血書詩於壁云淋淋鮮血透征衣未  
死臣軀強鬥持東望賊來無將敵西馳兵潰失軍機千年  
遺笑我先笑一木難支且暫支骨化形枯忠未補丹心報  
國總難移書畢卽死死在呼吸猶忍痛作韻語奇矣忠烈  
赫赫固不以工拙論而意思周摯字句沉痛讀之鬼神爲  
泣

程雨琴祖潤江蘇人中甲辰進士善書深得爭座位帖筆  
意工詩署合州爲余書屏兼讀以前所爲詩述懷云療貧  
無奇策賴有十畝田種秫可供飽種桑可飼蠶攜酒花下  
酌一醉何陶然久與隣父別相聚曠周旋胷中無俗累尙

論千載前坐對松間鶴行看水上煙不希世人愛應爲造  
物憐自然庵聽潮云一枕夢初覺松床足偃仰月明櫓聲  
閒夜靜人語響深壑魚龍唼隔岸烟波長三更鐘漏沈寒  
潮自來往雨中登木末樓云木末樓前路寒烟鎖碧蘿鶯  
花江岸盡風雨海門多阮籍仍狂醉孫登自嘯歌六朝佳  
麗處唼眺復如何過丁卯橋懷許仲晦故宅云莫雲深處  
問歸樵見說遺墩隔小橋詞客有靈唼夜月碧山無主聽  
春潮斜陽擁樹增惆悵嘯鳥招人破寂寥猶記瓊仙清夢  
遠只今來訪尙吹簫成都寓齋望雨云廉纖細雨熟梅天  
節過端陽尙著綿有暇讀書非淺福無人知我卽頑仙筆

經洗濯鋒都歛詩落風塵句怕傳一種閒情何處寄浣花  
溪外看秧田

葛道從明經名運隆芸子性嗜學以博雅推重一時陳倉  
道上云路轉陳倉石徑紆丹梯翠麓馬踟躕烟迷鳳嶺羣  
山暗風撼梁山峭壁孤如蟻行來天一線飛泉逼近雨千  
珠觀音塢上峯迴秀快覽秦中古帝都六月九日二閘泛  
舟云學問事無窮心地不容隘喜從賢達遊可以開眼界  
我聞二閘間好景如圖畫山色鬱葱蘢水勢肆澎湃久欲  
一問津泛舟窮險怪曠然得清友與我賦行邁攜手出城  
南片帆相與挂蘭橈擊空明詠諧同茶話薰風特地吹披

襟何爽快人從水國來酒向高樓賣坐久絕煩惱返棹嗤  
賈介羽扇蔽斜陽緩步忘疲憊歸來興且豪拈韻償詩債  
臨邛懷古云文君性愛才司馬非漁色兩賢適相遇琴心  
不自飭佳話久流傳顏色想傾國我昨見儀容額凸面皮  
黑始疑終乃悟不禁長太息惜哉古之人鍾情兩迷惑白  
璧有微瑕欲磨磨不得道從能爲古文新溫二邑碑板文  
字多出其手

賈茂科字紀亭雙流入沉酣詩古以茂才終晚宿余家寺  
與諸友唱和云孤村迤邐暮雲平草草庵扉喜未扃暴雨  
跳珠終夜響懸燈裏月半床明安排筆墨權雙韻顛倒衣

袞話五更最是山僧情意好杯盤狼籍百盞傾過寺側柳  
溝云曾過長隄剛幾時柳條依舊裊青絲不因見慣年年  
樣定向當頭折一枝

傳泰淑字慎齋成都人國學生聞海氛逼近廣州春來難  
斷雨淋聲天亦含愁不放晴擊柝連城驚戍火攜柑無客  
聽啼鶯不聞羽扇軍飛渡久梗商船海上行南越風花無  
恙否關心數問五羊城江源蜀國遠通潮畫舫笙歌想寂  
寥飛檣聯聯催戰急望洋黯黯欲魂消幾經鶴唳來三楚  
佇俟鷹揚下九霄樂土翻爲鋒鏃地空山振觸一身遙

宜賓胡一山瀛康熙間翰林官湖南按察方面豐頤美鬚



髣髴有松桂堂詩集遊師來山山在郭西北三里而近昔  
有人見道士浮空而下止于山頂俗呼道士爲師因以名  
山山前有鬱姑臺蓋勝地也作詩云三台聳拔秀而靈作  
我草堂西壁之畫屏開簾望遠涉前庭歛見雲白與峰青  
行行直欲跨山顛且緣石磴上雲邊嘯天門兮風冷然應  
知師來之山別洞天危樓憑虛起怪石砌橋底百尺荷潭  
清龜龍得不死路轉峰回身益高蒼崖老樹宿烏號洞亭  
厰豁七星朝宮闕熒煌插漢霄降魔作鎮驅妖嘯駕鶴眞  
人俯江臯左右迴廊鐘鼓嘹石磬鏗然月下敲鬱姑琪草  
非凡物何怪飛錫來幽谷獨是當年採藥人一去千載空

雲屋瑤池信息終杳茫紛紛塵宇烟光速我思山源路不  
迷重來曠士胸次奇丹爐丘壑恣搜討流水桃花自得師  
春雪用東坡韻和夏南暉云東風未放柳條葉亂捲盈堦  
飄白雪縞衣仙子天際來一派空明正清絕疊翠層巒山  
色老凍凝古木殘枝折千村漠漠鳥不飛人踪馬跡半迷  
滅閉門何處訪袁安書生裘敝肘見掣乘興還思剡溪遊  
不羨豪華衣紫纈四顧塵埃自此消惟有梅花伴玉屑翻  
憶遠人征戍勞塞外陰雲愁飄瞥從來壯士守邊關雪垂  
雙鬢何須說漢庭仗節應有人傲寒奇骨強勝鉄篋山詠  
懷兼呈副戎王公云邊城高控石如林萬壑峰頭老樹森

雪壓重關春未暖烟迷遠嶂地常陰西番到處傳殊俗南  
國何人寄好音賴有詩書能領畧談經一慰故園心秋興  
云劍門風雨薊臺雲劍門在蜀萬疊青山蜀道分宦海竟成歧  
路客芸窗擬作途窮文霜寒子夜蘆花發月照殘燈蟋蟀  
聞歎息杜陵秋思苦江湖到處惜離羣

里居時見崇寧尉李某刻書一册歷言修嚴君平墓事云  
君平墓久迷所在某處有高阜巍然上有關帝廟按志詳  
考其地不疑乃撤廟立碑致信于家太翁喜爲之加飯來  
蜀閱沈東里石室存稿有贈李南陔詩自注記其考得君  
平墓事乃知南陔卽其人而名則久忘矣他志以嚴爲真

君並傳有洞謂其修養仙去而儼然有墓可無疑也東里  
詩起云仙尉吾同志天涯信所之高名孚物望末吏餉王  
師次云隱君今有墓仙侶舊無橋註云并修呂仙橋又云  
荒厨酒一瓢其人安貧好學可知其三有云久病餘肝胆  
孤吟泣鬼神兼工詩故與東里契惜未見所作墓在崇寧  
西南二十里讀書臺在縣西賣卦井在西南漢州雁橋東  
有君平卜臺高數丈故宅在成都縣西卽賣卜處後來相  
傳云宅內有支機石姓莊名遵字君平後人蓋以避諱改  
其姓

又卽州亦有  
君平故里

人皆以相如爲成都人實今之蓬州人後遷成都又居臨

三  
三  
印三處皆有琴臺蓬州隋之相如縣以相如所居之地而  
名明初乃省入蓬州其故宅在州南琴臺在宅右傍嘉陵  
江周地圖記臺高六尺周四十四步後人建祠明學使盧  
雍詩云蜀中人物稱豪傑漢室文章擅大家此地卜居猶  
故迹當時名縣豈虛誇琴臺積雨蒼苔潤祠屋濱江草樹  
嘉莫問少年親滌器高風千載重詞華江北有相如坪傳  
長卿治別業於此墓在灌縣東十二里

李太白隴西世族故居舊志云在彰明縣青蓮鄉而平武  
縣東南亦有青蓮鄉接江油彰明界古今郡邑忽分忽合  
難執一也有漫波渡相傳白母浣紗於此鯉躍入籃烹食

遂有孕不如母夢長庚入懷之說爲雅也綿州李石亭化  
楠詩云騎鯨人去迹猶畱冷淡村烟弔李侯奴視權閹眞  
有骨詩非老杜竟無儔秋風落日漫波渡夜雨荒原粉竹  
樓太白星精長不死龍門俎豆肅千秋按江油有太白臺  
讀書臺蜀杜光庭詩云山中猶有讀書臺風掃晴嵐畫幃  
開華月冰壺依舊在青蓮居士幾時來彰明縣西南有李  
白宅相傳池生青蓮有蓮花池粉竹樓遺址猶存蓋三縣  
地相連故各爭爲已有漫波渡舊有太白樓今爲龍門書  
院石亭所咏蓋在彰明

需次在省寓鄭靜山成基故宅人云卽楊子雲墨池所在

隔壁卽聶蓉峰所建墨池書院今成都縣署卽其故宅有  
子雲亭洗墨池前漢書言處邨有田一畝有宅一區邨縣  
有讀書臺子雲亭在其側墓在縣西二十里吾鄉王雲芝  
先生作記云邨之西一舍許舊有漢儒子雲亭厯世滋久  
淪于荒榛邵博詩云自負天人學甘居寂寞濱卻憐載酒  
客似識草元人三世官應拙一區宅更貧千載尋故里感  
涕獨沾巾後人譏子雲仕莽朱楊維基據桓譚新語雄作  
甘泉賦夢腸出收而納之明日遂卒祠甘泉在成帝永始  
四年去王莽竊國時遠本傳未言仕莽贊謂其受莽官作  
符命投閣年七十一天鳳五年卒子雲見成帝時年已四

十餘至此殆將百歲年數不符其言甚辨

按宅爲縣署池不應在外

彭山有漢張綱故里晉李密故里各以忠孝著李光緒詩云農夫去惡草力殫不敢置如何埋輪者直待繡衣使得時則鵲起浩氣帥吾志極目望岷嶺夕陽映山翠孤松出寒林霜雪披寒荆棲鳥歸得食啞啞哺所生若移孝作忠當官見至情無爲章句士一字毀人名

蓋指爲朝國字原表本荒字李

密祖母沒仍仕晉官終漢中太守

老蘇之祖白蓮道人遇蔣山人示葬地命取燈一盞燃於其所雖大風不搖動老蘇公墓在眉者地名龍溝後人虛擬之處其冢非真據歐陽公誌銘葬於彭山安鎮鄉可龍



里東坡妻王氏墓誌云先君命軾曰汝必葬諸其姑之側  
六月壬午葬於眉之東北彭山縣安鎮鄉可龍里先君先  
夫人之西北八步則老蘇葬此無疑按彭山縣南至眉州  
順江場十五里

蘇子由告身宋徽宗大觀二年八寶告成加朝奉大夫藏  
於霍山裔孫名文斌家明成化間其妻以舊業爲鄰侵佔  
持誥軸懇於巡撫王肱王還之又爲人得去後廬州太守  
馬公買獲訪得其後人名虎者還其誥眉州紳士爲蘇祠  
置田求其後江津蘇學藏有東坡小像雜其手翰以獻考  
其譜系乃子由後遂以奉祀明季蜀亂祠墓榛蕪康熙間

修葺嘉慶四年邑人丈量蘇庄田一百八十四畝城內田  
十五畝並有水塘歲取租奉祭

河南陝州小我眉有老蘇墓蓋取衣冠以葬左子瞻右子  
由墳外有二冢莫有知爲蘇氏者一冢爲盜發掘吾鄉章  
邱張石只先生篤行宰陝視其穴得誌銘云夫人梁氏宋  
狀元灝之曾孫適子由長子遲乃拾其遺骨葬之捕盜置  
於法舊栢三百株明季爲流賊剪伐補種翠栢千章西南  
百步廣慶寺佛殿後有祠堂祀三先生嘉慶癸酉豫大饑  
飢民樵林發屋僧不能守有田七百畝亦蕪廢四川楊海  
梁先生國楨時爲方伯因學使吳韻皋慈鶴之言與中丞

梁公共捐千五百金又募金數千庀而新之既成設祭羅拜祠下者數萬人是能繼吾鄉石只先生之志者也子由詰身事見李東陽記甚詳

睢州周應鰲父貿易西寧爲夷人擄賣爲奴文俸去家六月始生應鰲年十八欲尋父請於母攜信具以行歷數千里徧訪諸夷得父處父不識應鰲出信具父恍然曰眞吾兒也相持哭不能起羣驚問故則皆出涕畱數日應鰲徧拜諸酋長夷人感其誠椎牛大饗送歸一家  
傳其事生無見父死難甘獨歷邊山道路難  
共仰夷人洒淚染衣丹